

FLA

255/

Km

1883

V. 4







讀雪山房唐詩卷八

凡例三  
詩三十

小傳三

目錄一

七古凡例

武進管世銘韞山氏著

李嶠汾陰行步伐整齊詞旨悽惻爲有唐一代七言古正聲所起特以列於盧駱之前

盧照鄰長安古意駱賓王帝京篇劉希夷代悲白頭翁張若虛春江花月夜何嘗非一時傑作然奏十篇以上得不厭而思去乎非開寶諸公豈識七言中有如許境界何大復未之思也

郭代公元振寶劍篇與薛少保稷陝郊五言詩均爲子美服膺見於本集可見古人虛心好善折服前輩若此

張燕公鄴都引晝攜壯士破堅陣夜接詞人賦華屋王岑而



下均不能爲此言

王摩詰善能錯綜子史而言不欲盡詞旨溫麗音節鏗鏘蔚然爲一朝冠冕

李東川七言古詩只讀得兩漢書爛熟故信手揮灑無一俗料俗韻

高常侍豪宕感激岑嘉州創闢經奇各有建大將旗鼓出井陘之意

李供奉歌行長句縱橫開闔不可端倪高下短長唯變所適昂昂若千里之駒汎汎若水中之鳧太白斯近之矣

一人作一面目王李高岑太白所能也一篇出一面目王李高岑太白所不能也杜工部七言古詩隨物賦形因題立制



如怒猊抉石如香象渡河如秋隼搏空如春鯨跋浪如洞庭  
張樂魚龍出聽如昆陽濟師飢饑皆震如太原公子楊裘高  
步而來如許下狂生蹀躞摻撾而至千態萬狀不可殫名悲  
喜無端俯仰自失觀止之歎意在斯乎

韋蘇州落落數篇氣息古雅正不可廢大厯諸子兼長七言  
古者推盧綸韓翃比之摩詰東川可稱具體獨劉隨州通篇  
少振拔處亦筆力之限於天授也

李杜旣沒正聲訕然昌黎偁興始傑然復有丈夫之氣惟波  
瀾頓挫小不及耳

劉賓客長篇雖不逮韓之奇橫而健舉略足相當七古劉之  
敵韓猶五古郊之匹愈也卽夢得五言亦自質雅可誦世乃



謂其不工古詩何其武斷

樂府古詞陳陳相因易於取厭張文昌王仲初創爲新製文  
今意古言淺諷深頗合三百篇興觀羣怨之旨白樂天尤工  
此體至欲藉以感悟宸聰敷陳民瘼其積愈厚故其言愈昌  
特音節骯骯乖於杜韓正響要亦天地間不可少之一種文  
字也元微之骨色稍庸精擇數篇自足相敵至張王尙有古  
音元白始全今調則又可爲知者道也

李長吉不屑作一常語奇處直欲突過昌黎不善學之得其  
晦昧格塞則墮入惡道矣

李義山韓碑句奇語重追步退之轉韻七十二句贈同舍開  
合頓挫中一振當日凡庸之習三百年之後勁也



溫飛卿遁作別調七言之齊梁歟錄其一二以備歌行之變  
鄭嵎津陽門詩七言百韻爲三唐歌行中第一長幅可與連  
昌宮詞長恨歌參觀惟七言音節昌黎以後頓爾銷亡知之  
者僅長吉義山數人至宋永叔子瞻魯直諸公而後復此篇  
正恨其讀之不響耳

唐七言古詩整齊於高岑王李飄灑於太白沈雄於少陵倔  
強於昌黎蓋猶七雄之並峙也前之王楊盧駱後之元白張  
王則宋衛中山之君也韓翃盧綸王李之附庸昌谷樊南退  
之之屬國也惟李杜則昌黎而外蓋莫敢問津焉



其時其時之不學耳



讀雪山房唐詩卷八

詩人小傳

入前已見者  
不再錄

李嶠

字巨山趙州贊皇人兒時夢人遺雙筆由是有文

辭弱冠擢進士第始調安定尉舉制策甲科武后

時官鳳閣舍人每有大手筆皆特命嶠爲之累遷

鸞臺侍郎知政事封趙國公景龍中以特進守兵

部尙書同中書門下三品睿宗立出刺懷州明皇

貶爲滁州別駕改廬州嶠富於才思初與王楊接

踵中與崔蘇齊名晚諸人沒獨爲文章宿老一時

學者取法焉集五十卷今鈔七古一首五律四首

七律二首五排一首五絕二首



王勃

字子安絳州龍門人文中子通之孫六歲善文辭

未冠應舉及第授朝散郎數獻頌闕下沛王聞其名召署府修撰是時諸王鬪雞勃戲爲文檄英王雞高宗斥之勃旣廢客劒南久之補虢州參軍坐事復除名勃父福時坐勃故左遷交趾令勃往交趾省父渡海溺水悸而卒年二十八勃好讀書屬文初不精思先磨墨數升引被覆面而臥忽起書之不易一字時人謂之腹藁與楊炯盧照鄰駱賓王皆以文章齊名天下稱王楊盧駱號四傑勃有集三十卷今鈔七古一首五律二首五絕六首七

絕一首



駱賓王

義烏人七歲能屬文尤妙于五言詩嘗作帝京篇  
當時以爲絕唱初爲道王府屬厯武功主簿又調  
長安主簿武后時左遷臨海丞怏怏矢志棄官去  
徐敬業舉義署爲府屬爲敬業草檄斥武后罪狀  
后讀之矍然歎曰宰相安得失此人敬業事敗賓  
王亡命不知所終中宗時詔求其文得數百篇集  
成十卷今鈔七古一首五律二首五排二首五絕  
二首

張若虛

揚州人兗州兵曹與賀知章張旭包融號吳中四  
士今鈔七古一首

王泠然

開元五年登第王邱典吏部選時嘗被獎拔官校



書郎急於仕進有上張說書稱公之用人蓋已多  
矣僕之思用其來久矣僕雖不佞亦相公一株桃  
李也今鈔七古一首

丁仙芝

曲阿人登開元進士第爲餘杭尉今鈔七古一首  
五律一首五絕三首

郭元振

名震魏州貴鄉人以字顯少有大志十八舉進士  
爲通泉尉任俠使氣撥去小節嘗盜鑄及掠賣部  
中口千餘以餉遺賓客武后召欲詰與語奇之索  
所爲文章上寶劒篇后覽嘉歎授右武衛鎧曹參  
軍進奉宸監丞久之拜涼州都督中宗神龍中遷  
左驍衛將軍安西大都護睿宗立召爲太僕卿景



雲二年進同中書門下三品先天元年爲朔方大  
總管明年以兵部尙書復同中書門下三品封代  
國公明皇講武驪山以軍容不整流新州開元元  
年起爲饒州司馬道病卒集二十卷今鈔七古一  
首五律一首五絕四首

王翰

字子羽晉陽人登進士第舉直言極諫調昌樂尉  
復舉超拔羣類召爲秘書正字擢通事舍人駕部  
員外出爲汝州長史改仙州別駕日與才士豪俠  
飲樂游畋坐貶道州司馬卒集十卷今鈔七古一  
首

孫逖

河南人開元中三擢甲科擢左拾遺表舉幕職入



爲集賢院修撰改考功員外郎遷中書舍人典詔  
誥判刑部侍郎終太子詹事諡曰文集二十卷今  
鈔七古一首五律四首七律一首五排一首五絕  
一首

李康成

天寶中與李杜同時其赴使江東劉長卿有詩送  
之嘗撰玉臺後集自陳後主隋煬帝江總庾信沈  
宋王楊盧駱而下二百九人詩六百七十首彙爲  
十卷自載其詩八篇今鈔七古一首五絕一首  
開寶間進士今鈔七古一首

張萬頃



讀雪山房唐詩卷八

七古目錄一

李嶠一首

王勃一首

盧照鄰一首

駱賓王一首

劉希夷二首

張若虛一首

王泠然一首

丁仙芝一首

沈佺期一首

宋之問三首

郭元振一首

張說一首

王翰一首

孫逖一首

崔顥四首

王維九首

孟浩然一首

常建一首

李頎十七首

王昌齡三首

薛奇童一首

張謂二首

李康成一首

張萬頃一首

王季友三首

岑參十八首

高適九首



元結三首



讀雪山房唐詩卷八

七古

汾陰行

李嶠

君不見昔日西京全盛時  
汾陰后土親祭祠  
齋宮宿寢設儲  
供撞鐘鳴鼓樹羽旂  
漢家五葉才且雄  
賓延萬靈朝九戎  
柏梁賦詩高宴罷  
詔書法駕幸河東  
河東太守親掃除  
奉迎至尊導鑾輿  
五營夾道列容衛  
三河縱觀空里閭  
回旌駐蹕降靈場  
焚香奠醑邀百祥  
金鼎發色正焜煌  
靈祇煒燁攄景光  
埋玉陳牲禮神畢  
舉麾上馬乘輿出  
彼汾之曲嘉可遊  
木蘭爲楫桂爲舟  
櫂歌微吟綵鷁浮  
簫鼓哀鳴白雲秋  
歡娛宴洽賜羣后  
家家復除戶牛酒  
聲明動天樂無有  
千秋萬歲南山



言雪山房詩卷之六  
壽自從天子向秦關玉輦金車不復還珠簾羽扇長寂寞鼎  
湖龍髯安可攀千齡人事一朝空四海爲家此路窮英雄意  
氣今何在壇場宮館盡蒿蓬路逢故老長歎息世事回環不  
可測昔時青樓對歌舞今日黃埃聚荆棘山川滿目淚沾衣  
富貴榮華能幾時不見祗今汾水上唯有年年秋雁飛

臨高臺

王勃

臨高臺高臺迢遞絕浮埃瑤軒綺構何崔嵬鸞歌鳳吹清且  
哀俯瞰長安道萋萋御溝草斜對甘泉路蒼蒼茂陵樹高臺  
四望同帝鄉佳氣鬱蔥蔥紫閣丹樓紛照耀壁房錦殿相玲  
瓏東彌長樂觀西指未央宮赤城映朝日綠樹搖春風旗亭  
百隊開新市甲第千甍分戚里朱輪翠蓋不勝春疊榭層楹



相對起復有青樓大道中繡戶文窗雕綺櫳錦衾夜不褰羅  
帷畫未空歌屏朝掩翠妝鏡晚窺紅爲君安寶髻蛾眉罷花  
叢塵間狹路黯將暮雲開月色明如素鴛鴦池上兩兩飛鳳  
凰樓下雙雙度物色正如此佳期那不顧銀鞍繡轂盛繁華  
可憐今夜宿倡家倡家少婦不須顰東園桃李片時春君看  
舊日高臺處柏梁桐雀生黃塵

長安古意

盧照鄰

長安大道連狹斜青牛白馬七香車玉輦縱橫過主第金鞭  
絡繹向侯家龍銜寶蓋承朝日鳳吐流蘇帶晚霞百丈遊絲  
爭繞樹一羣嬌鳥共啼花啼花戲蝶千門側碧樹銀臺萬種  
色複道交窗作合歡雙闕連蔓垂鳳翼梁家畫閣天中起漢



帝金莖雲外直樓前相望不相知陌上相逢詎相識借問吹  
簫向紫煙曾經學舞度芳年得成比目何辭死願作鴛鴦不  
羨仙比目鴛鴦真可羨雙去雙來君不見生憎帳額繡孤鸞  
好取門簾帖雙燕雙燕雙飛繞畫梁羅帷翠被鬱金香片片  
行雲著蟬鬢纖纖初月上鴉黃鴉黃粉白車中出含嬌含態  
情非一妖童寶馬鐵連錢娼婦盤龍金屈膝御史府中烏夜  
啼廷尉門前雀欲栖隱隱朱城臨玉道遙遙翠幃沒金隄挾  
彈飛鷹杜陵北探丸借客渭橋西俱邀俠客芙蓉劍共宿娼  
家桃李蹊娼家日暮紫羅裙清歌一嘯口氛氲北堂夜夜人  
如月南陌朝朝騎似雲南陌北堂連北理五劇三條控三市  
弱柳青槐拂地垂佳氣紅塵暗天起漢代金吾千騎來翡翠



屠蘇鸚鵡杯羅襦寶帶爲君解燕歌趙舞爲君開別有豪華  
稱將相轉日回天不相讓意氣由來排灌夫專權判不容肅  
望專權意氣本豪雄青虬紫燕坐春風自言歌舞長千載自  
謂驕奢凌五公節物風光不相待桑田碧海須臾改昔時金  
階白玉堂卽今惟見青松在寂寂寥寥楊子居年年歲歲一  
牀書獨有南山桂花發飛來飛去襲人裾

帝京篇

駱賓王

山河千里國城闕九重門不覩皇居壯安知天子尊皇居帝  
里嶠函谷鶉野龍山侯甸服五緯連影集星躔八水分流橫  
地軸秦塞重關一百二漢家離宮三十六桂殿嶽岑對玉樓  
椒房窈窕連金屋三條九陌麗城隈萬戶千門平旦開複道



斜通鳩鵲觀交衢直指鳳凰臺劍履南宮入簪纓北闕來聲  
名冠寰宇文物象昭回鉤陳肅蘭戺璧沼浮槐市銅羽應風  
回金莖承露起校文天祿閣習戰昆明水朱邸抗平臺黃扉  
通戚里平臺戚里帶崇墉炊金饌玉待鳴鐘小堂綺帳三千  
戶大道青樓十二重寶蓋雕鞍金絡馬蘭窗繡柱玉盤龍繡  
柱璇題粉壁映鏘金鳴玉王侯盛王侯貴人多近臣朝遊北  
里暮南鄰陸賈分金將讌喜陳遵投轄正畱賓趙李經過密  
蕭朱交結親丹鳳朱城白日暮青牛紺幘紅塵度俠客珠彈  
垂楊道娼婦銀鈎采桑路倡家桃李自芳菲京華遊俠盛輕  
肥延年女弟雙飛人羅敷使君千騎歸同心結縷帶連理織  
成衣春朝桂尊尊百味秋夜蘭燈燈九微翠幌珠簾不獨映



清歌寶瑟自相依且論三萬六千是甯知四十九年非古來  
榮利若浮雲人生倚伏信難分始見田竇相移奪俄聞衛霍  
有功勳未厭金陵氣先開石槨文朱門無復張公子灞亭誰  
畏李將軍相顧百齡皆有待居然萬化咸應改桂枝芳氣已  
銷亡柏梁高宴今何在春去春來苦自馳爭名爭利徒爾爲  
久畱郎署終難遇空掃相門誰見知紀事無上四句當時一旦擅豪  
華自言千載長驕奢倏忽搏風生羽翼須臾失浪委泥沙黃  
雀徒巢桂青門遂種瓜黃金銷鑠素絲變一貴一賤交情見  
紅顏宿昔白頭新脫粟布衣輕故人故人有湮淪新知無意  
氣灰死韓安國羅傷翟廷尉已矣哉歸去來馬卿辭蜀多文  
藻揚雄仕漢乏良媒三冬自矜誠足用十年不調幾遄迴汲



言雪山房集詩卷八  
黯薪逾積孫宏閣未開誰惜長沙傳獨負洛陽才

公子行

劉希夷

天津橋下陽春水天津橋上繁華子馬聲迴合青雲外人影  
動搖綠波裏綠波蕩漾玉爲砂青雲離披錦作霞可憐楊柳  
傷心樹可憐桃李斷腸花此日遨遊邀美女此時歌舞入娼  
家娼家美女鬱金香飛來飛去公子傍的的珠簾白日映娥  
娥玉顏紅粉妝花際裴回雙蛺蝶池邊顧步兩鴛鴦傾國傾  
城漢武帝爲雲爲雨楚襄王古來容光人所羨況復今日遙  
相見願作輕羅著細腰願爲明鏡分嬌面與君相向轉相親  
與君雙棲共一身願作貞松千歲古誰論芳槿一朝新百年  
同謝西山日千秋萬古北邙塵



代悲白頭翁

洛陽城東桃李花飛來飛去落誰家  
洛陽女兒好顏色坐見落花長歎息  
今年花落顏色改明年花開復誰在  
已見松柏摧爲薪更聞桑田變成海  
古人無復洛城東今人還對落花風  
年年歲歲花相似歲歲年年人不同  
寄言全盛紅顏子應憐半死白頭翁  
此翁白頭真可憐伊昔紅顏美少年  
公子王孫芳樹下清歌妙舞落花前  
光祿池臺開錦繡將軍樓閣畫神仙  
一朝臥病無相識三春行樂在誰邊  
宛轉蛾眉能幾時須臾鶴髮亂如絲  
但看古來歌舞地惟有黃昏鳥雀悲

春江花月夜

張若虛

春江潮水連海平海上明月共潮生  
灩灩隨波千萬里何處



春江無月明江流宛轉遶芳甸月照花林皆似霰空裏流霜  
不覺飛汀上白沙看不見江天一色無纖塵皎皎空中孤月  
輪江畔何人初見月江月何年初照人人生代代無窮已江  
月年年祗相似不知江月待何人但見長江送流水白雲一  
片去悠悠青楓浦上不勝愁誰家今夜扁舟子何處相思明  
月樓可憐樓上月裴迴應照離人妝鏡臺玉戶簾中卷不去  
擣衣砧上拂還來此時相望不相聞願逐月華流照君鴻雁  
長飛光不度魚龍潛躍水成文昨夜閑潭夢落花可憐春半  
不還家江水流春去欲盡江潭落月復西斜斜月沈沈藏海  
霧碣石瀟湘無限路不知乘月幾人歸落月搖情滿江樹

題河邊枯柳

王冷然



隋家天子憶揚州，厭坐深宮傍海游。  
穿地鑿山開御路，鳴笳疊鼓泛清流。  
流從鞏北分河口，直到淮南種官柳。  
功成力盡人旋亡，代謝年移樹空有。  
當時綵女侍君王，繡帳旌門對柳行。  
青葉交垂連幔色，白花飛度染衣香。  
今日摧殘何用道，數里曾無一枝好。  
驛騎征帆損更多，山精野魅藏應老。  
涼風九月露爲霜，日夜孤舟八帝鄉。  
河畔時時聞木落，客中無不淚沾裳。

餘杭醉歌贈吳山人

丁仙芝

曉幕紅襟燕，春城白項烏。  
只來梁上語，不向府中趨。  
城頭坎坎鼓聲曙，滿庭新種櫻桃樹。  
桃花昨夜撩亂開，當軒發色映樓臺。  
十千兌得餘杭酒，二月春城長命杯。  
酒後畱君待明月。



還將明月送君回

人少蜜縣

沈佺期

雲峰苔壁繞溪斜江路香風夾岸花樹蜜不言通鳥道雞鳴  
始覺有人家人家更在深巖口澗水周流宅前後遊魚瞥瞥  
雙釣童伐木丁丁一樵叟自言避喧非避秦薜衣耕鑿帝堯  
人相畱且待雞黍熟夕臥深山蘿月春

明河篇

宋之問

八月涼風天氣晶萬里無雲河漢明昏見南樓清且淺曉落  
西山縱復橫洛陽城闕天中起長河夜夜千門裏複道連薨  
共蔽虧畫堂瓊戶特相宜雲母帳前初泛濫水精簾外轉透  
迤倬彼昭回如練白復出東城接南陌南陌征人去不歸誰



家今夜擣寒衣鴛鴦機上疏螢度烏鵲橋邊一雁飛雁飛螢  
度愁難歇坐見明河漸微沒已能舒卷任浮雲不惜光輝讓  
流月明河可望不可親願得乘槎一問津更將織女支機石  
還訪成都賣卜人

桂州三月三日

代業京華裡遠投魑魅鄉登高望不極雲海四茫茫伊昔承  
休盼曾爲人所羨兩朝賜顏色二紀陪歡宴昆明御宿侍龍  
媒伊闕天泉復幾回西夏黃河水心劒東周清洛羽觴杯苑  
中落花掃還合河畔垂楊撥不開千春萬壽多行樂柏梁和  
歌攀睿作賜金分帛奉恩輝風舉雲搖入紫微晨趨北闕鳴  
珂至夜出南宮把燭歸載筆儒林多歲月襍被文昌佐吳越



越中山海高且深興來無處不登臨永和九年刺海郡暮春  
三月醉山陰愚謂嬉遊長似昔不言流寓歎成今始安繁華  
舊風俗帳飲傾城沸江曲主人絲管清且悲客子肝腸斷還  
續荔浦蘅皋萬里餘洛陽音信絕能疏故園今日應愁思曲  
水何能更被除逐伴誰憐合浦葉思歸豈食桂江魚不求漢  
使金囊贈願得佳人錦字書

至端州驛見杜五審言沈三佺期閣五朝隱王二無競  
題壁慨然成詠

逐臣北地承嚴譴謂到南中每相見豈意南中岐路多千山  
萬水分鄉縣雲搖雨散各翻飛海闊天長音信稀處處山川  
同瘴癘自憐能得幾人歸



寶劍篇

郭元振

君不見昆吾鐵冶飛炎煙紅光紫氣俱赫然良工鍛鍊凡幾年  
鑄得寶劍名龍泉龍泉顏色如霜雪良工咨嗟歎奇絕琉璃玉匣吐蓮花錯鏤金環映明月正逢天下無風塵幸得周  
防君子身精光黯黯青蛇色文章片片綠龜鱗非直結交游  
俠子亦曾親近英雄人何言中路遭棄捐零落漂淪古獄邊  
雖復塵埋無所用猶能夜夜氣衝天

鄴都引

張說

君不見魏武草創爭天祿羣雄睚眦相馳逐晝攜壯士破堅  
陣夜接詞人賦華屋都邑繚繞西山陽桑榆汗漫漳河曲城  
郭爲墟人代改但有西園明月在鄴傍高塚多貴臣娥眉暝



睽共灰塵試上銅臺歌舞處唯有秋風愁殺人

飲馬長城窟行

王翰

長安少年無遠圖一生唯羨執金吾麒麟前殿拜天子走馬  
西擊長城胡胡沙獵獵吹人面漢虜相逢不相見遙聞鼙鼓  
動地來傳道單于夜猶戰此時願恩甯願身爲君一行摧萬  
人壯士揮戈迴白日單于斃血染朱輪歸來飲馬長城窟長  
城道傍多白骨問之耆老何代人云是秦王築城卒黃昏塞  
北無人煙鬼哭啾啾聲沸天無罪見誅功不賞孤魂流落此  
城邊當昔秦王按劍起諸侯膝行不敢視富國強兵二十年  
築怨興徭九千里秦王築城何太愚天實亡秦非北胡一朝  
禍起蕭牆內渭水咸陽不復都



春日留別

孫逖

春路透迤花柳前孤舟晚泊就人煙  
東山白雲不可見西陵江月夜娟娟  
春江夜盡潮聲度征帆遙從此中去  
越國山川看漸無可憐愁思江南樹

長安道

一作霍將軍

崔顥

長安甲第高人雲誰家居住霍將軍  
日晚朝迴擁賓從路傍揖拜何紛紛  
莫言炙手手可熱須臾火盡灰亦滅  
莫言貧賤即可欺人生富貴自有時  
一朝天子賜顏色世上悠悠應始知

孟門行

黃雀銜黃花翩翩傍簷隙本擬報君恩  
如何反彈射金罍美



詩集山房詩卷八  
酒滿座春平原愛才多眾賓滿堂盡是忠義士何意得有讒  
諛人諛言反覆那可道能令君心不自保北園新栽桃李枝  
根株未固何轉移成陰結實君自取若問傍人那得知

七夕

長安城中月如練家家此夜持針線仙裾玉佩空自知天上  
人間不相見長信深陰夜轉幽瑤階金閣數螢流班姬此夕  
愁無限河漢三更看斗牛

代閨人答輕薄少年

妾家近隔鳳凰池粉壁紗窗楊柳垂本期漢代金吾壻誤嫁  
長安遊俠兒兒家夫壻多輕薄借客探丸重然諾平明挾彈  
入新豐日晚揮鞭出長樂青絲白馬冶遊園能使行人駐馬



看自矜陌上繁華盛不念閨中花鳥闌花間陌上春將晚走  
馬鬪雞猶未返三時出望無消息一去那知行近遠桃李花  
開覆井欄朱樓落日捲簾看愁來欲奏相思曲抱得秦箏不  
忍彈

夷門歌

王維

七雄雄雌猶未分攻城殺將何紛紛秦兵益圍邯鄲急魏王  
不救平原君公子爲嬴停駟馬執轡愈恭意愈下亥爲屠肆  
鼓刀人嬴乃夷門抱關者非但慷慨獻良謀意氣兼將身命  
酬向風刎頸送公子七十老翁何所求

隴頭吟

長安少年遊俠客夜上戍樓看太白隴頭明月迴臨關隴上



行人夜吹笛關西老將不勝愁駐馬聽之雙淚流身經大小  
百餘戰麾下偏裨萬戶侯蘇武纔爲典屬國節旄落盡海西  
頭

老將行

少年十五二十時步行奪得胡馬騎射殺中山白額虎肯數  
鄴下黃鬚兒一身轉戰三千里一劍曾當百萬師漢兵奮迅  
如霹靂虜騎崩騰畏疾藜衛青不敗由天幸李廣無功緣數  
奇自從棄置便衰朽世事蹉跎成白首昔時飛箭無全目今  
日垂楊生左肘路傍時賣故侯瓜門前學種先生柳蒼茫古  
木連窮巷寥落寒山對虛牖誓令疏勒出飛泉不似潁川空  
使酒賀蘭山下陣如雲羽檄交馳日夕聞節使三河募年少



詔書五道出將軍試拂鐵衣如雪色聊持寶劍動星文願得  
燕弓射天將恥令越甲鳴吳軍莫嫌舊日雲中守猶堪一戰  
取功勳

桃源行

漁舟逐水愛山春兩岸桃花夾去津坐看紅樹不知遠行盡  
青溪不見人山口潛行始隈隩山開曠望旋平陸遙看一處  
攢雲樹近入千家散花竹樵客初傳漢姓名居人未改秦衣  
服居人共住武陵源還從物外起田園月明松下房櫳靜日  
出雲中雞犬喧驚聞俗客爭來集競引還家問都邑平明閭  
巷埽花開薄暮漁樵乘水入初因避地去人間及至成仙遂  
不還峽裏誰知有人事世中遙望空雲山不疑靈境難聞見



言學上房詩卷八  
塵心未盡思鄉縣出洞無論隔山水辭家終擬長游衍自謂  
經過舊不迷安知峰壑今來變當時只記入山深青溪幾曲  
到雲林春來遍是桃花水不辨仙源何處尋

洛陽女兒行

時年十六

洛陽女兒對門居纔可容顏十五餘良人玉勒乘驄馬侍女  
金盤脍鯉魚畫閣朱樓盡相望紅桃綠柳垂簷向羅帷送上  
七香車寶扇迎歸九華帳狂夫富貴在青春意氣驕奢劇季  
倫自憐碧玉親教舞不惜珊瑚持與人春窗曙滅九微火九  
微片片飛花璫戲罷曾無理曲時妝成祇是薰香坐城中相  
識盡繁華日夜經過趙李家誰憐越女顏如玉貧賤江頭自

浣紗



同崔傅答賢弟

洛陽才子姑蘇客，桂苑殊非故鄉陌。  
九江楓樹幾回青，一片揚州五湖白。  
揚州時有下江兵，蘭陵鎮前吹笛聲。  
夜火人歸富春郭，秋風鶴唳石頭城。  
周郎陸弟爲儔侶，對舞前溪歌白紵。  
曲几書畱小史家，草堂碁賭山陰墅。  
衣冠若話外臺臣，先數夫君席上珍。  
更聞臺閣求三語，遙想風流第一人。

故人張諲工詩善易卜，兼能丹青學隸。  
頃以詩見贈聊復酬之。

不逐城東游俠兒，隱囊紗帽坐彈碁。  
蜀中夫子時開卦，洛下書生解詠詩。  
藥欄花逕衡門裡，時復據梧聊隱几。  
屏風誤點惑孫郎，團扇草書輕內史。  
故園高枕度三春，永日垂帷絕四



詩集卷之六  
鄰自想蔡邕今已老更將書籍與何人

送崔五太守

長安廐吏來到門朱文露網動行軒黃花縣西九折阪玉樹  
宮南五丈原褰斜谷中不容幘唯有白雲當露冕子午山裡  
杜鵑啼嘉陵水頭行客飯劍門忽斷蜀川開萬井雙流滿眼  
來霧中遠樹刀州出天際澄江巴字回使君年紀三十餘少  
年白晢專城居欲持畫省郎官筆回與臨邛父老書

答張五弟

終南有茅屋前對終南山終年無客常閉關終日無心長自  
閑不妨飲酒復垂釣君但能來相往還

夜歸鹿門山歌

孟浩然



山寺鐘鳴晝已昏  
漁梁渡頭爭渡喧  
人隨沙路向江村  
余亦乘舟歸鹿門  
鹿門月照開煙樹  
忽到龐公棲隱處  
巖扉松徑長寂寥  
惟有幽人夜來去

古意

常建

井底玉冰動地明  
琥珀轆轤青絲索  
仙人騎鳳披彩霞  
挽上銀瓶照天閣  
黃金作身雙飛龍  
口銜明月噴芙蓉  
一時渡海望不見  
曉上青樓十二重

古從軍行

李頎

白日登山望烽火  
黃昏飲馬傍交河  
行人刁斗風沙暗  
公主琵琶幽怨多  
野雲萬里無城郭  
雨雪紛紛連大漠  
胡鴈哀鳴夜夜飛  
胡兒眼淚雙雙落  
聞道玉門猶被遮  
應將性命逐輕



言  
車年年戰骨埋荒外空見蒲桃入漢家

行路難

漢家名臣楊德祖四代五公享茅土父子兄弟綰銀黃躍馬  
鳴珂朝建章火浣單衣繡方領茱萸錦帶玉盤囊賓客填街  
復滿座片言出口生輝光世人逐勢爭奔走瀝膽墮肝惟恐  
後當時一顧登青雲自謂生死長隨君一朝謝病還鄉里窮  
巷蒼苔絕知己秋風落葉閉重門昨日論文竟誰是薄俗嗟  
嗟難重陳深山麋鹿可爲鄰魯連所以蹈東海古往今來稱  
達人

緩歌行

小來託身攀貴遊傾財破產無所憂暮擬經過石渠署朝將



出入銅龍樓結交杜陵輕薄子謂言可生復可死一沈一浮  
會有時棄我翻然如脫屣男兒立身須自強十年閉戶穎水  
陽業就功成見明主擊鐘鼎食坐華堂二八蛾眉梳墮馬美  
酒清歌曲房下文昌宮中賜錦衣長安陌上退朝歸五陵賓  
從莫敢視三省官僚揖者稀早知今日讀書是悔作從前任  
狹非

放歌行答從弟墨卿

小來好文恥學武世上功名不解取雖沾寸祿已後時徒欲  
出身事明主柏梁賦詩不及宴長楸走馬誰相數斂迹俛眉  
心自甘高歌擊節聲半苦由是蹉跎一老夫養雞牧豕東城  
隅空歌漢代蕭相國肯事霍家馮子都徒爾當年聲籍籍濫



言集山房詩卷八  
作詞林兩京客故人斗酒安陵橋黃鳥春風洛陽陌吾家令  
弟才不羈五言破的人共推興來逸氣如濤湧千里長江歸  
海時別離短景何蕭索佳句相思能間作舉頭遙望魯陽山  
木葉紛紛向人落

同張員外諲酬答之作

洛中高士日沈冥手自灌園方帶經王湛床頭見周易長康  
傳裡好丹青鶚冠葛屨無名位博奕賦詩聊遣意清言只到  
衛家兒用筆能誇鍾太尉東籬二月種蘭蓀窮巷人稀烏雀  
喧聞道郎官問生事肯令鬢髮老柴門

答高三十五畱別便呈于十一

累薦賢良皆不就家近陳畱訪耆舊韓康雖復在人間王霸



終思隱巖竇清冷池水灌園蔬萬物滄江心澹如妻子歡同  
五株柳雲山老對一床書昨日公車見三事明君賜衣遣爲  
吏懷章不使郡邸驚待詔初從闕庭至散誕由來自不羈低  
頭授職爾何爲故園壁挂烏紗帽官舍塵生白接羅寄書寂  
寂於陵子蓬蒿沒身胡不仕藜羹被褐環堵中歲晚將貽故  
人恥

送康洽入京進樂府歌

識子十年何不遇只愛歡遊兩京路朝吟左氏嬌女篇夜誦  
相如美人賦長安春物舊相宜小苑蒲萄花滿枝柳色偏濃  
九華殿鶯聲醉殺五陵兒曳裾此日從何所中貴由來盡相  
許白袂春衫仙吏贈烏皮隱几臺郎與新詩樂府唱堪愁御



言事上房詩卷六  
三  
妓應傳鵲樓西上雖因長公主終須一見曲陵侯

### 送劉十

三十不官亦不娶時人焉識道高下房中唯有老氏經櫪上空餘少游馬往來嵩華與函秦放歌一曲前山春西林獨鶴引閑步南澗飛泉清角巾前年上書不得意歸臥東窗兀然醉諸兄相繼掌青史第五之名齊驃騎烹葵摘果告我行落日夏雲縱復橫問道謝安掩口笑知君不免爲蒼生

### 別梁鎰

梁生倜儻心不羈途窮氣蓋長安兒回頭轉眄似鵬鶚有志飛鳴人豈知雖云四十無祿位曾與大軍掌書記抗顏請刃誅部曲作色論兵犯二帥一言不合龍頤侯擊劍拂衣從此



棄朝朝飲酒黃公壚脫帽露頂爭叫呼庭中犢鼻昔嘗挂懷  
裡琅玕今在無時人見子多落魄共笑狂歌非遠圖忽然遣  
躍紫驢馬還是昂藏一丈夫洛陽城頭曉霜白層冰峨峨滿  
川澤但聞行路吟新詩不歎舉家無擔石莫言貧賤長可欺  
覆簣成山當有時莫言富貴長可託木槿朝看暮還落不見  
古時塞上翁倚伏由來任天作去去滄波不復陳五湖三江  
愁殺人

送陳章甫

四月南風大麥黃棗花未落桐陰長青山朝別暮還見嘶馬  
出門思舊鄉陳侯立身何坦蕩虬鬚虎眉仍大顙腹中貯書  
一萬卷不肯低頭在草莽東門沽酒飲我曹心輕萬事皆鴻



詩集山房集卷八  
六  
毛醉臥不知白日暮有時空望孤雲高長河浪頭連天黑津  
口停舟渡不得鄭國遊人未及家洛陽行子空歎息聞道故  
林相識多罷官昨日今如何

愛敬寺古藤歌

古藤池水盤樹根左攫右拏龍虎蹲橫空直上相陵突丰茸  
離纏若無骨風雷霹靂連黑枝人言其下藏妖魑空庭落葉  
乍開合十月苦寒常倒垂憶昨花飛滿空殿密葉吹香飯僧  
遍南階雙桐一百尺相與年年老霜霰

崔五丈圖屏風各賦一物得烏孫佩刀

烏孫腰間佩兩刀刀可吹毛錦爲帶握中枕宿穹廬室馬上  
割飛翳螭塞執之魑魍誰能前氣凜清風沙漠邊磨用陰山



一片玉洗將胡地獨流泉主人屏風寫奇狀鐵鞘金銀儼相  
向回頭瞪目時一看使予心在江湖上

古意

男兒事長征少小幽燕客賭勝馬蹄下由來輕七尺殺人莫  
敢前鬚如蝟毛磔黃雲隴底白雲飛未得報恩不能歸遼東  
小婦年十五慣彈琵琶解歌舞今爲羌笛出塞聲使我三軍  
淚如雨

雜興

沈沈牛渚磯舊說多靈怪行人夜秉生犀燭洞照洪深闕滂  
湃乘車駕馬往復旋赤紱朱冠何偉然波驚海若潛幽石龍  
抱胡髯臥黑泉水濱丈人曾有語物或惡之當害汝武昌妖



夢果爲災百代英威埋鬼府青青蘭艾本殊香  
察見泉魚固不祥濟水自清河自濁周公大聖接輿狂  
千年魑魅逢華表九日茱萸作佩囊善惡死生齊一貫  
祇應斗酒任蒼蒼

送劉昱

八月寒葦花秋江浪頭白北風吹五兩誰是潯陽客  
鷓鴣山頭微雨晴揚州郭裡暮潮生行人夜宿金陵渚  
試聽沙邊有鴈聲

送郝判官

楚城木葉落夏口青山遍鴻鴈向南時君乘使者傳  
楓林帶水驛夜火明山縣千里送行人蔡州如眼見  
江連清漢東逶迤遙望荆雲相蔽虧應問襄陽舊風俗  
爲余騎馬習家池



聽董大彈胡笳聲兼寄語弄房給事

蔡女昔造胡笳聲一彈一十有八拍胡人落淚沾邊草漢使  
斷腸對歸客古戍蒼蒼烽火寒大荒沈沈飛雪白先拂商絃  
後角羽四郊秋葉驚撼撼董夫子通神明深山竊聽來妖精  
言遲更速皆應手將往復旋如有情空山百鳥散還合萬里  
浮雲陰且晴嘶酸雛鴈失羣夜斷絕胡兒戀母聲川爲淨其  
波鳥亦罷其鳴烏孫部落家鄉遠邏娑沙塵哀怨生幽音變  
調忽飄灑長風吹林雨墮瓦迸泉颯颯飛木末野鹿呦呦走  
堂下長安城連東掖垣鳳凰池對青鎖門高才脫略名與利  
日夕望君抱琴至

烏棲曲

王昌齡



白馬逐朱車黃昏入狹邪  
狹邪柳樹烏爭宿爭枝未得飛上  
屋東房少婦堦從軍每聽烏啼知夜分

城傍曲

秋風鳴桑條草白孤兔驕  
邯鄲飲來酒未消城北原平掣阜  
鵬射殺空營兩騰虎迴身卻月佩弓弣

箜篌引

盧谿郡南夜泊舟夜聞兩岸羌戎謳  
其時月黑猿啾啾微雨霑衣令人愁  
有一遷客登高樓不言不寐彈箜篌  
彈作薊門桑葉秋風沙颯颯青塚頭  
將軍鐵驄汗血流深入匈奴戰未休  
黃旗一點兵馬收亂殺胡人積如邱  
瘡病驅來配邊州仍披漠北羔羊裘  
顏色饑枯掩面羞眼眶淚滴深兩眸  
思還本



鄉食鰲牛欲語不得指咽喉或有強壯能呶嘍意說被他邊  
將讐五世屬番漢主畱碧毛氊帳河曲游橐駝五萬部落稠  
勅賜飛鳳金甁盞爲君百戰如過籌靜掃陰山無鳥投家藏  
鉄券特承優黃金千斤不稱求九族分離作楚囚深谿寂寞  
絃苦幽草木悲感聲颼颼僕本東山爲國憂明光殿前論九  
疇簾讀兵書盡冥搜爲君掌上施權謀洞曉山川無與傳紫  
宸詔發遠懷柔搖筆飛霜如奪鉤鬼神不得知其由憐愛蒼  
生比蚍蜉朔河屯兵須漸抽盡遣降來拜御溝便令海內休  
戈矛何用班超定遠侯史臣書之得已不

雲中行

薛奇童

雲中小兒吹金管向晚因風一川滿塞北雲高心已悲城南



言雪山房詩卷八  
本落腸堪斷憶昔魏家都此方涼風觀前朝百王千門曉映  
山川色雙闕遙連日月光舉杯稱壽永相保日夕歌鐘徹清  
昊將軍汗馬百戰場天子射獸五原草寂寞金輿去不歸陵  
上黃塵滿路飛河邊不語傷流水川上含情歎落暉此時獨  
立無所見日暮寒風吹客衣

代北州老翁答

張謂

負薪老翁往北州北望鄉關生客愁自言老翁有三子兩人  
已向黃沙死如今小兒新長成明年聞道又徵兵定知此別  
必零落不及相隨同死生盡將田宅借鄰伍且復伶俜去鄉  
土在生本求多子孫及有誰知更辛苦近傳天子尊武臣強  
兵直欲靜胡塵安邊自合有長策何必流離中國人



湖上對酒行

夜坐不厭湖上月  
晝行不厭湖上山  
眼前一尊又長滿  
心中萬事如等閒  
主人有黍百餘石  
濁醪數斗應不惜  
卽今相對不盡歡  
別後相思復何益  
茱萸灣頭歸路賒  
願君且宿黃公家  
風光若此人不醉  
參差辜負東園花

采蓮曲

李康成

采蓮去月沒春江  
曙翠鈿紅袖水中央  
青荷蓮子雜衣香  
雲起風生歸路長  
歸路長那得久  
各迴船兩搖手

東溪待蘇戶曹不至

張萬頃

洛陽城東伊水西  
千花萬竹使人迷  
臺上柳枝臨岸低  
門前荷葉與橋齊  
日暮待君君不見  
長風吹雨過青溪



酬李十六岐

王季友

鍊丹文武火未成賣藥販履俱逃名出谷迷行洛陽道乘流  
醉臥滑臺城城下故人久離怨一歡適我兩家願朝飲杖懸  
沽酒錢暮餐囊有松花飯于何車馬日憧憧李膺門館爭登  
龍千賓揖對若流水五經發難如叩鐘下筆新詩行滿壁立  
談古人坐在席問我草堂有臥雲知我山儲無儋石自耕自  
刈食爲天如鹿如麋飲野泉亦知世上公卿貴且養邱中草  
木年

宿東溪李十五山亭

上山下山入山谷溪中落日畱我宿松石依依當主人主人  
不在意亦足名花出地兩重階絕頂平天一小齋本意由來



是山水何用相逢語舊懷

觀于舍人壁畫山水

野人宿在人家少朝見此山謂山曉半壁仍棲嶺上雲開簾  
欲放湖中鳥獨坐長松是阿誰再三招手起來遲于公大笑  
向予說小弟丹青能爾爲

白雪歌送武判官歸京

岑參

北風捲地白草折胡天八月卽飛雪忽然一夜春風來千樹  
萬樹梨花開散入珠簾濕羅幕狐裘不煖錦衾薄將軍角弓  
不得控都護鐵衣冷難著瀚海闌干百丈冰愁雲黦淡萬里  
凝中軍置酒飲歸客胡琴琵琶與羌笛紛紛暮雪下轅門風  
掣紅旗凍不翻輪臺東門送君去去時雪滿天山路山迴路



言雪上房屋詩卷八  
三  
轉不見君雪上空畱馬行處

熱海行送崔侍御還京

側聞陰山胡兒語西頭熱海水如煮海上眾鳥不敢飛中有  
鯉魚長且肥岸傍青草常不歇空中白雪遙旋滅蒸沙爍石  
然虜雲沸浪炎波煎漢月陰火潛燒天地爐何事偏烘西一  
隅勢吞月窟侵太白氣連赤阪通單于送君一醉天山郭正  
見夕陽海邊落柏臺霜威寒逼人熱海炎氣爲之薄

輪臺歌奉送封大夫出師西征

輪臺城頭夜吹角輪臺城北旄頭落羽書昨夜過渠黎單于  
已在金山西戍樓西望煙塵黑漢兵屯在輪臺北上將擁旄  
西出征平明吹笛大軍行四邊伐鼓雪海湧三軍大呼陰山



動虜塞兵氣連雲屯戰場白骨纏草根劍河風急雪片闊沙  
口石凍馬蹄脫亞相勤王甘苦辛誓將報主靜邊塵古來青  
史誰不見今見功名勝古人

天山雪歌送蕭治歸京

天山有雪常不開千峰萬嶺雪崔嵬北風夜捲赤亭口一夜  
天山雪更厚能兼漢月照銀山復逐胡風過鐵關交河城邊  
飛鳥絕輪臺路上馬蹄滑晡靄寒氛萬里凝闌干陰崖千丈  
冰將軍狐裘臥不暖都護寶刀凍欲斷正是天山雪下時送  
君走馬歸京師雪中何以贈君別惟有青青松樹枝

火山雲歌送別

火山突兀赤亭口火山五月火雲厚火雲滿山凝未開飛鳥



千里不敢來平明乍逐胡風斷薄暮渾隨塞雨回繚繞斜吞  
鐵關樹氛氲半掩交河戍迢迢征路火山東山上孤雲隨馬  
去

走馬川行奉送出師西征

君不見走馬川行雪海邊平沙莽莽黃入天輪臺九月風夜  
吼一川碎石大如斗隨風滿地石亂走匈奴草黃馬正肥金  
山西見煙塵飛漢家大將西出師將軍金甲夜不脫半夜軍  
行戈相撥風頭如刀面如割馬毛帶雪汗氣蒸五花連錢旋  
作冰幕中草檄硯水凝虜騎聞之應膽懾料知短兵不敢接  
車師西門伫獻捷

胡笳歌送顏真卿使赴河隴



君不聞胡笳聲最悲紫髯綠眼胡人吹吹之一曲猶未了愁  
殺樓蘭征戍兒涼秋八月蕭關道北風吹斷天山草崑崙山  
南月欲斜胡人向月吹胡笳胡笳怨兮將送君秦山遙望隴  
山雲邊城夜夜多愁夢向月胡笳誰喜聞

與獨孤漸道別長句兼呈嚴八侍御

輪臺客舍春草滿潁陽歸客腸堪斷窮荒絕漠鳥不飛萬磧  
千山夢猶嬾憐君白面一書生讀書千卷未成名五侯貴門  
腳不到數畝山田身自耕興來浪迹無遠近及至辭家憶鄉  
信無事垂鞭信馬頭西南幾欲窮天盡奉使三年獨未歸邊  
頭詞客舊來稀借問君來得幾日到家不覺換春衣高齋清  
晝卷帷幕紗帽接離傭不著中酒朝眠日色高彈碁夜半燈



千里不敢來平明乍逐胡風斷薄暮渾隨塞雨回繚繞斜吞  
鐵關樹氛氲半掩交河戍迢迢征路火山東山上孤雲隨馬  
去

走馬川行奉送出師西征

君不見走馬川行雪海邊平沙莽莽黃入天輪臺九月風夜  
吼一川碎石大如斗隨風滿地石亂走匈奴草黃馬正肥金  
山西見煙塵飛漢家大將西出師將軍金甲夜不脫半夜軍  
行戈相撥風頭如刀面如割馬毛帶雪汗氣蒸五花連錢旋  
作冰幕中草檄硯水凝虜騎聞之應膽懾料知短兵不敢接  
車師西門伫獻捷

胡笳歌送顏真卿使赴河隴



君不聞胡笳聲最悲紫髯綠眼胡人吹吹之一曲猶未了愁  
殺樓蘭征戍兒涼秋八月蕭關道北風吹斷天山草崑崙山  
南月欲斜胡人向月吹胡笳胡笳怨兮將送君秦山遙望隴  
山雲邊城夜夜多愁夢向月胡笳誰喜聞

與獨孤漸道別長句兼呈嚴八侍御

輪臺客舍春草滿潁陽歸客腸堪斷窮荒絕漠鳥不飛萬磧  
千山夢猶嬾憐君白面一書生讀書千卷未成名五侯貴門  
腳不到數畝山田身自耕興來浪迹無遠近及至辭家憶鄉  
信無事垂鞭信馬頭西南幾欲窮天盡奉使三年獨未歸邊  
頭詞客舊來稀借問君來得幾日到家不覺換春衣高齋清  
晝卷帷幕紗帽接離傭不著中酒朝眠日色高彈碁夜半燈



言雪月房月言卷八  
三  
花落冰片高堆金錯盤滿堂凜凜五月寒桂林蒲萄新吐蔓  
武城刺蜜未可餐軍中置酒夜搥鼓錦筵紅燭月未午花門  
將軍善胡歌葉河蕃王能漢語知爾園林壓渭濱夫人堂上  
泣羅裙魚龍川北盤谿雨鳥鼠山西洮水雲臺中嚴公於我  
厚別後新詩滿人口自憐棄置天西頭因君爲問相思否

太白胡僧歌

并序

太白中峰絕頂有胡僧不知幾百歲眉長數寸身不  
製繪帛衣以草葉恆持楞伽經雲壁迴絕人跡罕到  
嘗東峰有鬪虎弱者將死僧杖而解之西湫有毒龍  
久而爲患僧器而貯之商山趙叟前年采茯苓深入  
太白偶值此僧訪我而說予恆有獨往之意聞而悅



之乃爲歌曰

聞有胡僧在太白蘭若去天三百尺一持楞伽入中峰世人  
難見但聞鐘窗邊錫杖解兩虎牀下鉢盂藏一龍草衣不綴  
復不線兩耳垂肩眉覆面此僧年幾那得知手種青松今十  
圍心將流水同清淨身與浮雲無是非商山老人已曾識願  
一見之何由得山中有僧人不知城裏看山空黛色

衛節度赤驃馬歌

君家赤驃畫不得一團旋風桃花色紅纓紫鞵珊瑚鞭玉鞍  
錦韉黃金勒請君韝出看君騎尾長率地如紅絲自矜諸馬  
皆不及卻憶百金新買時香街紫陌鳳城內滿城見者誰不  
愛揚鞭驟急白汗流弄影行騎碧蹄碎紫髯胡雛金剪刀平



言山房詩卷六  
三  
明翦出三鬟高櫪上看時獨意氣眾中牽出偏雄豪騎將獵  
向南山口城南狐兔不復有草頭一點疾如飛卻使蒼鷹翻  
向後憶昨看君朝未央鳴珂擁蓋滿路香始知邊將真富貴  
可憐人馬相輝光男兒稱意得如此駿馬長鳴北風起待君  
東去埽胡塵爲君一日行千里

韋員外家花樹

今年花似去年好去年人到今年老始知人老不如花可惜  
落花君莫埽君家兄弟不可當列卿御史尙書郎朝回花底  
恆會客花撲玉缸春酒香

玉門關蓋將軍歌

蓋將軍真丈夫行年三十執金吾身長七尺頗有鬚玉門關



城迴且孤黃沙萬里白草枯南鄰犬戎北接胡將軍到來備  
不虞五千甲兵膽力麤軍中無事但歡娛暖屋繡簾紅地爐  
織成壁衣花翟毬燈前侍婢瀉玉壺金鎗亂點野酡酥紫紱  
金章左右趨問著只是蒼頭奴美人一雙閑且都朱脣翠眉  
映明矚清歌一曲世所無今日喜聞鳳將雛可憐絕勝秦羅  
敷使君五馬設踟躕野草繡窠紫羅襦紅牙纓馬對櫟蒲玉  
盤纖手撒作盧中誇道不會輸櫪上昂昂皆駿駒桃花叱  
撥價最殊騎將獵向城南隅臘日射殺千年狐我來塞外安  
邊儲爲君取醉酒剩沽醉爭酒盞相喧呼忽憶咸陽舊酒徒  
送魏升卿擢第歸東都因懷校書陸渾喬潭  
井上桐葉雨灞亭卷秋風故人適戰勝匹馬歸山東問君今



年三十幾能使香名滿人耳君不見三峰直上五千仞見君  
文章亦如此如君兄弟天下稀雄辭健筆皆若飛將軍金印  
鞶紫綬御史鐵冠重繡衣喬生作尉別來久因君爲問平安  
否魏侯校理復何如前日人來不得書陸渾山下佳可賞蓬  
閣閑時日應往自料青雲未有期誰知白髮偏能長壚頭青  
絲白玉瓶別時相顧酒如傾搖鞭舉袂忽不見千樹萬樹空  
蟬鳴

西亭子送李司馬

高高亭子郡城西直上千尺與雲齊盤崖緣壁試攀躋羣山  
向下飛鳥低使君五馬天半嘶絲繩玉壺爲君提坐來一望  
無端倪紅花綠柳鶯亂啼千家萬井連迴溪酒行未醉聞暮



雞點筆操紙爲君題爲君題惜解攜草萋萋沒馬啼

漁父

扁舟滄浪叟心與滄浪清不自道鄉里無人知姓名朝從灘上飯暮向蘆中宿歌竟還復歌手持一竿竹竿頭釣絲長丈餘鼓棹乘流無定居世人那得識深意此翁取適非取魚

登古鄴城

下馬登鄴城城空復何見東風吹野火暮入飛雲殿城隅南對望陵臺漳水東流不復回武帝宮中人去盡年年春色爲誰來

送郭乂雜言

地上青草出經冬今始歸博陵無近信猶未換春衣憐汝不



言言詩卷八  
忍別送汝上酒樓初行莫早發且宿灞橋頭功名須及早歲  
月莫虛擲早年已工詩近日兼注易何時過東洛早晚度盟  
津朝歌城邊柳韞地邯鄲道上花撲人去年四月初我正在  
河朔會上君家縣北樓樓上分明見恆嶽中山明府待君來  
須計行程及早回到家速覓長安使汝自封書我自開

感遇

五花驄馬七香車云是平陽帝子家鳳凰城頭日欲斜門前  
高樹鳴春鴉漢家魯元君不聞今作城西一古墳昔來惟有  
秦王女獨自吹簫乘白雲

古大梁行

高適

古城莽蒼饒荆榛驅馬荒城愁殺人魏王宮觀盡禾黍信陵



賓客隨灰塵憶昨雄都舊朝市軒車照耀歌鐘起軍容帶甲  
三十萬國步連營一千里全盛須臾那可論高臺曲池無復  
存遺墟但見狐狸迹古地空餘草木根暮天搖落傷懷抱倚  
劍悲歌對秋草俠客猶傳朱亥名行人尙識夷門道白璧黃  
金萬戶侯寶刀駿馬填山邱年代淒涼不可問往來唯有水  
東流

邯鄲少年行

邯鄲城南游俠子自矜生長邯鄲裏千場縱博家仍富幾度  
報讐身不死宅中歌笑日紛紛門外車馬常如雲未知肝膽  
向誰是令人卻憶平原君君不見今人交態薄黃金用盡還  
疏索以茲感歎辭舊遊更於時事無所求且與少年飲美酒



詩集卷之八  
三  
往來射獵西山頭

燕歌行

開元二十六年客有從御史大夫張公出塞而還者  
作燕歌行以示適感征戍之事因而和焉

漢家煙塵在東北漢將辭家破殘賊男兒本自重橫行天子  
非常賜顏色撻金伐鼓下榆關旌旆逶迤碣石間校尉羽書  
飛瀚海單于獵火照狼山山川蕭條極邊土胡騎憑陵雜風  
雨戰士軍前半死生美人帳下猶歌舞大漠窮秋塞草腓孤  
城落日鬪兵稀身當恩遇恆輕敵力盡關山未解圍鐵衣遠  
戍辛勤久玉筯應啼別離後少婦城南欲斷腸征人薊北空  
回首邊庭飄飄那可度絕域蒼茫更何有殺氣三時作陣雲



寒聲一夜傳刁斗相看白刃血紛紛死節從來豈顧勳君不見沙場征戰苦至今猶憶李將軍

人日寄杜二拾遺

人日題詩寄草堂遙憐故人思故鄉柳條弄色不忍見梅花滿枝空斷腸身在遠藩無所預心懷百憂復千慮今年人日空相憶明年人日知何處一臥東山三十春豈知書劍老風塵龍鍾還忝二千石愧爾東西南北人

贈別晉三處士

有人家住清河源渡河問我游梁園手持道經注已畢心知內篇口不言盧門十年見秋草此心惆悵誰能道知己從來不易知慕君爲人與君好別時九月桑葉疏出門千里無行



車愛君且欲君先達今上求賢早上書

送渾將軍出塞

將軍族貴兵且強漢家已是渾邪王子孫相承在朝野至今  
部曲燕支下控弦盡用陰山兒登陣常騎大宛馬銀鞍玉勒  
繡螯弧每逐嫖姚破骨都李廣從來先將士衛青未肯學孫  
吳傳有沙場千萬騎昨日邊庭羽書至城頭畫角三四聲匣  
裡寶刀晝夜鳴意氣能甘萬里去辛勤判作一年行黃雲白  
草無前後朝建旌旄夕刁斗塞下應多俠少年關西不見春  
楊柳從軍借問所從誰擊劒酣歌當此時遠別無輕繞朝策  
平戎早寄仲宣詩

封邱作



我本漁樵孟諸野一生自是悠悠者乍可狂歌草澤中甯堪  
作吏風塵下祇言小邑無所爲公門百事皆有期拜迎官長  
心欲碎鞭撻黎庶令人悲歸來向家問妻子舉家盡笑今如  
此生事應須南畝田世情付與東流水夢想舊山安在哉爲  
銜君命且遲迴乃知梅福徒爲爾轉憶陶潛歸去來

別韋參軍

英華作  
二首

二十解書劍西游長安城舉頭望君門屈指取公卿國風冲  
融邁三五朝廷歡樂彌寰宇白璧皆言賜近臣布衣不得干  
明主歸來洛陽無負郭東過梁宋非吾土兔苑爲農歲不登  
雁池垂釣心長苦世人遇我同眾人唯君於我最相親且喜  
百年有交態未嘗一日辭家貧

以下英華  
另作一首

彈碁擊筑白日晚



言言山房詩卷八  
三  
縱酒高歌楊柳春歡娛未盡分散去使我惆悵驚心神丈夫  
不作兒女別臨岐涕淚沾衣巾

崔司錄宅燕大理張卿

多雨殊未已秋雲更沈沈洛陽故人初解印山東小吏來相  
尋上卿才大名不朽早朝至尊暮求友豁達常推海內賢殷  
勤但酌尊中酒飲醉欲言歸剡溪門前駟馬光照衣路旁觀  
者徒唧唧我公不以爲是非

說洞溪招退者

元結

長松亭亭滿四山山間乳竇流清泉洞溪正在此山裡乳水  
松膏常灌田松膏乳水田肥長稻苗如蒲米粒長糜色如珈  
玉液酒酒熟猶聞松節香溪邊老翁年幾許長男頭白孫嫁



女問言只食松田米無藥無方向人語浯溪石下多泉源盛  
暑大寒冬大溫屠蘇宜在水中石澗溪一曲自當門吾今欲  
作澗溪翁誰能住我舍西東勿憚山深與地僻羅浮尙有葛  
仙翁

宿丹崖翁宅

扁舟欲到瀧口湍春水湍瀧上水難投竿來泊丹崖下得與  
崖翁盡一歡丹崖之亭當石顛破竹半山引寒泉泉流掩映  
在木杪有若白鳥飛林間往往隨風作霧雨濕人巾履滿庭  
前丹崖翁愛丹崖棄官幾年崖下家兒孫棹船抱酒甕醉裏  
長歌揮釣車吾將求退與翁遊學翁歌醉在魚舟官吏隨人  
往未得卻望丹崖慙復羞



石魚湖上醉歌

并序

漫叟以公田米釀酒因休暇則載酒于湖上時取一  
醉歡醉中據湖岸引臂向魚取酒使舫載之徧飲坐  
者意疑倚巴邱酌于君山之上諸子環洞庭而坐酒  
舫泛泛然觸濤波而往來者乃作歌以長之

石魚湖似洞庭夏水欲滿君山青青山爲樽水爲沼酒徒歷  
歷坐洲島長風連日作大浪不能廢人運酒舫我持長瓢坐  
巴邱酌飲四坐以散愁



讀雪山房唐詩卷九 目錄一 詩十六

七古目錄二

李白四十六首







讀雪山房唐詩卷九

七古二

遠別離

李白

遠別離古有皇英之二女乃在洞庭之南瀟湘之浦海水直  
下萬里深誰人不言此離苦日慘慘兮雲冥冥猩猩啼煙兮  
鬼嘯雨我縱言之將何補皇穹竊恐不照余之忠誠雲憑憑  
兮欲吼怒堯舜當之亦禪禹君失臣兮龍爲魚權歸臣兮鼠  
變虎或言堯幽囚舜野死九疑聯綿皆相似重瞳孤墳竟何  
是帝子泣兮綠雲間隨風波兮去無還慟哭兮遠望見蒼梧  
之深山蒼梧山崩湘水絕竹上之淚乃可滅

蜀道難



噫吁戲危乎高哉蜀道之難難於上青天蠶叢及魚鳧開國  
何茫然爾來四萬八千歲不與秦塞通人煙西當太白有鳥  
道可以橫絕峨眉巔地崩山摧壯士死然後天梯石棧相鉤  
連上有六龍回日之高標下有衝波逆折之回川黃鶴之飛  
尚不得過猿猱欲度愁攀援青泥何盤盤百步九折縈巖巒  
捫參厯井仰脅息以手撫膺坐長歎問君西游何時還畏途  
巖巖不可攀但見悲鳥號古木雄飛雌從繞林間又聞子規  
啼夜月愁空山蜀道之難難於上青天使人聽此凋朱顏連  
峰去天不盈尺枯松倒挂依絕壁飛湍瀑流爭喧豗砢崖轉  
石萬壑雷其險也如此嗟爾遠道之人胡爲乎來哉劒閣崢  
嶸而崔嵬一夫當關萬夫莫開所守或匪親化爲狼與豺朝



避猛虎夕避長蛇磨牙吮血殺人如麻錦城雖云樂不如早  
還家蜀道之難難於上青天側身西望長咨嗟

梁甫吟

長嘯梁甫吟何時見陽春君不見朝歌屠叟辭棘津八十西  
來釣渭濱甯羞白髮照清水逢時吐氣思經綸廣張三千六  
百鈞風期暗與文王親大賢虎變愚不測當年頗似尋常人  
君不見高陽酒徒起草中長揖山東隆準公入門不拜騁雄  
辯兩女輟洗來趨風東下齊城七十二指揮楚漢如旋蓬狂  
客落魄尙如此何況壯士當羣雄我欲攀龍見明主雷公砰  
訇震天鼓帝傍投壺多玉女三時大笑開電光倏爍晦冥起  
風雨閭闔九門不可通以額扣關閭者怒白日不照吾精誠



杞國無事憂天傾狻猊磨牙競人肉騶虞不折生草莖手接  
飛猱搏彫虎側足焦原未言苦智者可卷愚者豪世人見我  
輕鴻毛力排南山三壯士齊相殺之費二桃吳楚弄兵無劇  
孟亞夫哈爾爲徒勞梁甫吟梁甫吟聲正悲張公兩龍劍神  
物合有時風雲感會起屠釣大人峴岬當安之

烏夜啼

黃雲城邊烏欲棲歸飛啞啞枝上啼機中織錦秦川女碧紗  
如煙隔窗語停梭悵然憶遠人獨宿空房淚如雨

烏棲曲

姑蘇臺上烏棲時吳王宮裡醉西施吳歌楚舞歡未畢青山  
欲銜半邊日銀箭金壺漏水多起看秋月墜江波東方漸高



奈樂何

戰城南

去年戰桑乾源今年戰蔥河道洗兵條支海上波放馬天山  
雪中草萬里長征戰三軍盡衰老匈奴以殺戮爲耕作古來  
惟見白骨黃沙田秦家築城備胡處漢家還有烽火然烽火  
然不息征戰無已時野戰格鬪死敗馬號鳴向天悲烏鳶啄  
人腸銜飛上挂枯樹枝士卒塗草莽將軍空爾爲乃知兵者  
是凶器聖人不得已而用之

將進酒

君不見黃河之水天上來奔流到海不復迴君不見高堂明  
鏡悲白髮朝如青絲暮成雪人生得意須盡歡莫使金樽空



對月天生我材必有用千金散盡還復來烹羊宰牛且爲樂  
會須一飲三百杯岑夫子丹邱生將進酒君莫停與君歌一  
曲請君爲我側耳聽鐘鼓饌玉不足貴但願長醉不願醒古  
來聖賢皆寂寞惟有飲者留其名陳王昔時宴平樂斗酒十  
千恣謔譁主人何爲言少錢徑須沽取對君酌五花馬千金  
裘呼兒將出換美酒與爾同銷萬里愁

飛龍引

二首  
之一

鼎湖流水清且閑軒轅去時有弓劍古人傳道畱其間後宮  
嬋娟多花顏乘鸞飛煙亦不還騎龍攀天造天關造天關聞  
天語長雲河車載玉女載玉女過紫皇紫皇乃賜白兔所擣  
之藥方後天而老彫三光下視瑤池見王母蛾眉蕭颯如秋



霜

天馬歌

天馬來出月支窟背爲虎文龍翼骨嘶青雲振綠髮蘭筋權  
奇走滅沒騰崑崙歷西極四足無一蹙雞鳴刷燕晡秣越神  
行電邁躡恍惚天馬呼飛龍趨日明長庚憶雙鳧尾如流星  
首渴烏口噴紅光汗溝朱曾陪時龍躡天衢羈金絡月照皇  
都逸氣稜稜凌九區白壁如山誰敢沾回頭笑紫燕但覺爾  
輩愚天馬奔戀君軒駮音竦躍驚矯浮雲翻萬里足躑躅遙瞻  
閭闔門不逢寒風子誰採逸景孫白雲在青天邱陵遠崔嵬  
鹽車上峻阪倒行逆施畏日晚伯樂翦拂中道遺少盡其力  
老棄之願逢田子方惻然爲我悲雖有玉山禾不能療苦飢



言雪山房唐詩卷九 四  
嚴霜五月凋桂枝伏櫪銜冤摧兩眉請君贖獻穆天子猶堪  
弄影舞瑤池

行路難

三首  
之一

金樽清酒斗十千玉盤珍羞直萬錢停杯投筋不能食拔劍  
四顧心茫然欲渡黃河水塞川將登太行雪滿山閑來垂釣  
碧溪上忽復乘舟夢日邊行路難行路難多岐路今安在長  
風破浪會有時直挂雲帆濟滄海

上畱田行

行至上畱田孤墳何崢嶸積此萬古恨春草不復生悲風四  
邊來腸斷白楊聲借問誰家地埋沒蒿里塋古老向余言言  
是上畱田蓬科馬鬣今已平昔之弟死兄不葬他人於此舉



銘旌一鳥死百鳥鳴一獸走百獸驚桓山之禽別離苦欲去  
迴翔不能征田氏倉卒骨肉分青天白日摧紫荆交柯之木  
本同形東枝顛顛西枝榮無心之物尙如此參商胡乃尋天  
兵孤竹延陵讓國揚名高風緬邈頽波激清尺布之譖塞耳  
不能聽

白鳩辭

鏗鳴鐘考朗鼓歌白鳩引拂舞白鳩之白誰與鄰霜衣雪襟  
誠可珍含哺七子能平均食不噎性安馴首農政鳴陽春天  
子刻玉杖鏤形賜耆人白鷺之白非純眞外潔其色心匪仁  
闕五德無司晨胡爲啄我葭下之紫鱗鷹鷂鵠鵠貪而好殺  
鳳凰雖大聖不願以爲臣



日出行

日出東方隈似從地底來  
厯天又入海六龍所舍安在哉  
其始與終古不息人非元氣安得與之久  
裴徊草不謝榮於春風木不怨落於秋天  
誰揮鞭策驅四運萬物興歇皆自然  
羲和汝奚汨沒於荒淫之波魯陽何德駐景揮戈逆道違  
天矯誣實多吾將囊括大塊浩然與溟滓同科

北風行

燭龍棲寒門光曜猶旦開  
日月照之何不及此唯有北風號  
怒天上來燕山雪花大如席  
片片吹落軒轅臺幽州思婦十  
二月停歌罷笑雙蛾摧倚門望行人  
念君長城苦寒良可哀別時提劍救邊去  
遺此虎紋金鞞中有一雙白羽箭蜘蛛



結網生塵埃箭空在人今戰死不復回不忍見此物焚之已成灰黃河捧土尙可塞北風雨雪恨難裁

獨漉篇

獨漉水中泥水濁不見月不見月尙可水深行人沒越鳥從南來胡鷹亦北渡我欲彎弓向天射惜其中道失歸路落葉別樹飄零隨風客無所托悲與此同羅幃舒卷似有人開明月直入無心可猜雄劍挂壁時時龍鳴不斷犀象繡澀苔生國恥未雪何由成名神鷹夢澤不顧鴟鵂爲君一擊鵬搏九天

楊叛兒

君歌楊叛兒妾勸新豐酒何許最關人烏啼白門柳烏啼隱



詩集山房唐詩卷六  
楊花君醉畱妾家博山爐中沈香火雙煙一氣凌紫霞

山人勸酒

蒼蒼雲松落落綺皓春風爾來爲阿誰蝴蝶忽然滿芳草秀  
眉霜雪顏桃花骨青髓綠長美好稱是秦時避世人勸酒相  
歡不知老各守麋鹿志恥隨龍虎爭歛起佐太子漢王乃復  
驚顧謂戚夫人彼翁羽翼成歸來商山下泛若雲無情舉觴  
酌巢由洗耳何獨清浩歌望嵩嶽意氣還相傾

王昭君

漢家秦地月流影照明妃一上玉關道天涯去不歸漢月還  
從東海出明妃西嫁無來日燕支長寒雪作花蛾眉憔悴沒  
胡沙生乏黃金枉圖畫死畱青塚使人嗟



久別離

別來幾春未還家玉窗五見櫻桃花況有錦字書開緘使人  
嗟至此腸斷彼心絕雲鬟綠鬢罷梳結愁如同飆亂白雪去  
年寄書報陽臺今年寄書重相催東風兮東風爲我吹行雲  
使西來待來竟不來落花寂寂委青苔

白頭吟

錦水東北流波蕩雙鴛鴦雄巢漢宮樹雌弄秦草芳甯同萬  
死碎綺翼不忍雲間兩分張此時阿嬌正嬌妬獨坐長門愁  
日暮但願君恩顧妾深豈惜黃金買詞賦相如作賦得黃金  
丈夫好新多異心一朝將聘茂陵女文君因贈白頭吟東流  
不作西歸水落花辭條羞故林兔絲固無情隨風任傾倒誰



使女蘿枝而來強縈抱兩草猶一心人心不如草莫卷龍鬚  
席從他生網絲且畱琥珀枕或有夢來時覆水再收豈滿杯  
棄妾已去難重迴古來得意不相負祇今惟見青陵臺

長相思二首

日色已盡花含煙月明欲素愁不眠趙瑟初停鳳凰柱蜀琴  
欲奏鴛鴦絃此曲有意無人傳願隨春風寄燕然憶君迢迢  
隔青天昔日橫波目今成流淚泉不信妾腸斷歸來看取明  
鏡前

美人在時花滿堂美人去後空餘牀牀中繡被卷不寢至今  
三載猶聞香香亦竟不滅人亦竟不來相思黃葉落白露點  
青苔



襄陽歌

落日欲沒峴山西倒着接羅花下迷襄陽小兒齊拍手攔街  
爭唱白銅鞮傍人借問笑何事笑殺山翁醉似泥鷓鴣杓鸚  
鵡杯百年三萬六千日一日須傾三百杯遙看漢水鴨頭綠  
恰似蒲桃初醖醅此江若變作春酒壘麴便築糟邱臺千金  
駿馬換小妾笑坐雕鞍歌落梅車傍側挂一壺酒鳳簫龍管  
行相催咸陽市中歎黃犬何如月下傾金罍君不見晉朝羊  
公一片石龜頭剝落生莓苔淚亦不能爲之墮心亦不能爲  
之哀清風明月不用一錢買玉山自倒非人推舒州杓力士  
鎗李白與爾同死生襄王雲雨今安在江水東流猿夜聲

江上吟



言雪月房詩卷之八  
木蘭之枻沙棠舟玉簫金管坐兩頭美酒尊中置千斛載妓  
隨波任去畱仙人有待乘黃鶴海客無心隨白鷗屈平詞賦  
懸日月楚王臺榭空山邱興酣落筆搖五嶽詩成笑傲凌滄  
洲功名富貴若長在漢水亦應西北流

侍從宜春苑奉詔賦龍池柳色初青聽新鶯百轉歌

東風已綠瀛洲草紫殿紅樓覺春好池南柳色半青青縈煙  
嫋娜拂綺城垂絲百尺挂雕楹上有好鳥相和鳴間關早得  
春風情春風卷入碧雲去千門萬戶皆春聲是時君王在鎬  
京五雲垂暉耀紫清仗出金宮隨日轉天回玉輦繞花行始  
向蓬萊看舞鶴還過蒨石聽新鶯新鶯飛繞上林苑願入簫  
韶雜鳳笙



西嶽雲臺歌送丹邱子

西嶽崢嶸何壯哉黃河如絲天際來黃河萬里觸山動盤渦  
轂轉秦地雷榮光休氣紛五彩千年一清聖人在巨靈咆哮  
擘兩山洪波噴箭射東海三峰卻立如欲摧翠厓丹谷高掌  
開白帝金精運元氣石作蓮花雲作臺雲臺閣道連窈冥中  
有不死丹邱生明星玉女備灑掃麻姑搔背指爪輕我皇手  
把天地戶丹邱談天與天語九重出入生光輝東來蓬萊復  
西歸玉漿儻惠故人飲騎二茅龍上天飛

扶風豪士歌

洛陽三月飛胡沙洛陽城中人怨嗟天津流水波赤血白骨  
相撐如亂麻我亦東奔向吳國浮雲四塞道路賒東方日出



言  
啼早鴉城門人開掃落花梧桐楊柳拂金井來醉扶風豪士  
家扶風豪士天下奇意氣相傾山可移作人不倚將軍勢飲  
酒豈顧尙書期雕盤綺食會眾客吳歌趙舞香風吹原嘗春  
陵六國時開心寫意君所知堂中各有三千士明日報恩知  
是誰撫長劒一揚眉清水白石何離離脫君帽向君笑飲君  
酒爲君吟張良未逐赤松去橋邊黃石知我心

同族弟金城尉叔卿燭照山水壁畫歌

高堂粉壁圖蓬瀛燭前一見滄海清洪波洶湧山崢嶸皓若  
丹邱隔海望赤城光中乍喜嵐氣滅謂逢山陰晴後雪迴溪  
碧流寂無喧又如秦人月下窺花源了然不覺清心魂祇將  
疊嶂鳴秋猿與君對此歡未歇放歌行吟達明發卻顧海客



揚雲帆便欲因之向溟渤

梁園吟

我浮黃雲去京闕挂席欲進波連山天長水闊厭遠涉訪古  
始及平臺間平臺爲客憂思多對酒遂作梁園歌卻憶蓬池  
阮公詠因吟淶水揚洪波洪波浩蕩迷舊國路遠西歸安可  
得人生達命豈暇愁且飲美酒登高樓平頭奴子搖大扇五  
月不熱疑清秋玉盤楊梅爲君設吳鹽如花皎白雪持鹽把  
酒但飲之莫學夷齊事高潔昔人豪貴信陵君今人耕種信  
陵墳荒城虛照碧山月古木盡入蒼梧雲梁王宮闕今安在  
枚馬先歸不相待舞影歌聲散綠池空餘汴水東流海沈吟  
此事淚滿衣黃金買醉未能歸連呼五白行六博分曹賭酒



詩集卷九  
一  
酣馳輝歌且謠意方遠東方高臥時起來欲濟蒼生未應晚

鳴皋歌奉餞從翁清歸五厓山居

憶昔鳴皋夢裏還手弄素月清潭間覺時枕席非碧山側身  
西望阻秦關麒麟閣上春還早著書卻憶伊陽好青松來風  
吹古道綠蘿飛花覆煙草我家仙翁愛清真才雄草聖凌古  
人欲臥鳴皋絕世塵鳴皋微茫在何處五厓峽水橫樵路身  
披翠雲裘袖拂紫煙去去時應過嵩少間相思爲折三花樹

蛾眉山月歌送蜀僧晏入中京

我在巴東三峽時西看明月憶蛾眉月出蛾眉照滄海與人  
萬里長相隨黃鶴樓前月華白此中忽見蛾眉客蛾眉山月  
還送君風吹西到長安陌長安大道橫九天蛾眉山月照秦



川黃金獅子乘高座白玉麈尾談重元我似浮雲殢吳越君  
逢聖主遊丹闕一振高名滿帝都歸時還弄蛾眉月

贈裴十四

朝見裴叔則朗如行玉山黃河落天走東海萬里寫入曾懷  
間身騎白黿不敢度金高南山買君顧徘徊六合無相知飄  
若浮雲且西去

江夏行

憶昔嬌小姿春心亦自持爲言嫁夫壻得免長相思誰知嫁  
商賈令人卻愁苦自從爲夫妻何曾在鄉土去年下揚州相  
送黃鶴樓眼看帆去遠心逐江水流只言期一載誰謂歷三  
秋使妾腸欲斷恨君情悠悠東家西舍同時發北去南來不



逾月未知行李遊何方作箇音書能斷絕適來往南浦欲問  
西江船正見當壚女紅粧二八年一種爲人妻獨自多悲棲  
對鏡便垂淚逢人只欲啼不如輕薄兒且暮長相隨悔作商  
人婦青春長別離如今正好同懽樂君去容華誰得知

### 懷仙歌

一鶴東飛過滄海放心散漫知何在仙人浩歌望我來應攀  
玉樹長相待堯舜之事不足驚自餘囂囂直可輕巨黿莫戴  
三山去我欲蓬萊頂上行

### 流夜郎贈辛判官

昔在長安醉花柳五侯七貴同杯酒氣岸遙凌豪士前風流  
肯落他人後夫子紅顏我少年章臺走馬著金鞭文章獻納



麒麟殿歌舞淹留玳瑁筵與君自謂長如此甯知草動風塵起  
函谷忽驚胡馬來秦宮桃李向胡開我愁遠謫夜郎去何日  
金雞放赦回

贈漢陽輔錄事

鸚鵡洲橫漢陽渡水引寒煙沒江樹南浦登樓不見君君今  
罷官在何處漢口雙魚白錦鱗令傳尺素報情人其中字數  
無多少祇是相思秋復春

寄王屋山人孟大融

我昔東海上勞山餐紫霞親見安期公食棗大如瓜中年謁  
漢主不愜還歸家朱顏謝春輝白髮見生涯所期就金液飛  
步登雲車願隨夫子天壇上閑與仙人掃落花



詩集卷九  
三  
憶舊遊寄譙郡元參軍

憶昔洛陽董糟邱爲余天津橋南造酒樓黃金白璧買歌笑  
一醉累月輕王侯海內賢豪青雲客就中與君心莫逆迴山  
轉海不作難傾情倒意無所惜我向淮南攀桂枝君畱洛北  
愁夢思不忍別還相隨相隨迢迢訪仙城三十六曲水迴縈  
一溪初入千花明萬壑度盡松風聲銀鞍金絡倒平地漢東  
太守來相迎紫陽之真人邀我吹玉笙餐霞樓上動仙樂嘈  
然宛似鸞鳳鳴袖長管催欲輕舉漢中太守醉起舞手持錦  
袍覆我身我醉橫眠枕其股當筵意氣凌九霄星離雨散不  
終朝分飛楚關山水遙余旣還山尋故巢君亦歸家渡渭橋  
君家嚴君勇貌虎作尹并州遇戎虜五月相呼度太行推輪



不道羊腸苦行來北涼歲月深感君貴義輕黃金瓊杯綺食  
青玉案使我醉飽無歸心時時出向城西曲晉祠流水如碧  
玉浮舟弄水簫鼓鳴微波龍鱗莎草綠興來攜妓恣經過其  
若楊花似雪何紅粧欲醉宜斜日百尺清潭寫翠娥翠娥嬋  
娟初月輝美人更唱舞羅衣清風吹歌入空去歌曲自繞行  
雲飛此時行樂難再遇西遊因獻長楊賦北闕青雲不可期  
東山白首還歸去渭橋南頭一遇君鄼臺之北又離羣問余  
別恨知多少落花春暮爭紛紛言亦不可盡情亦不可極呼  
兒長跪緘此辭寄君千里遙相憶

寄韋南陵冰余江上乘興訪之遇尋顏尙書笑有此贈  
南船正東風北船來自緩江上相逢借問君語笑未了風吹



讀書山房唐詩卷九  
三  
斷聞君攜伎訪情人應爲尙書不顧身堂上三千珠履客  
囊中百斛金陵春恨我阻此樂淹畱楚江濱月色醉遠客  
山花開欲然春風狂殺人一日劇三年乘興嫌太遲焚卻  
子猷船夢見五柳枝已堪挂馬鞭何日到彭澤長歌陶令  
前

夢遊天姥吟畱別

一作別東魯諸公

海客談瀛洲煙濤微茫信難求越人語天姥雲霓明滅或可  
覩天姥連天向天橫勢拔五嶽掩赤城天台四萬八千丈對  
此欲倒東南傾我欲因之夢吳越一夜飛渡鏡湖月湖月照  
我影送我至剡溪謝公宿處今尙在淥水蕩漾清猿啼腳著  
謝公屐身登青雲梯半壁見海日空中聞天雞千巖萬轉路  
不定迷花倚石忽已暝熊咆龍吟殷巖泉慄深林兮驚層巔



雲青青兮欲雨水澹澹兮生煙列缺霹靂邱巒崩摧洞天石  
扇訇然中開青冥浩蕩不見底日月照耀金銀臺霓爲衣兮  
風爲馬雲之君兮紛紛而來下虎鼓瑟兮鸞迴車仙之人兮  
列如麻忽魂悸以魄動恍驚起而長嗟惟覺時之枕席失向  
來之煙霞世間行樂亦如此古來萬事東流水別君去時何  
時還且放白鹿青崖間須行卽騎訪名山安能摧眉折腰事  
權貴使我不得開心顏

金陵酒肆畱別

風吹柳花滿店香吳姬壓酒喚客嘗金陵子弟來相送欲行  
不行各盡觴請君試問東流水別意與之誰短長

南陵別兒童入京



言集山房詩卷下 四  
白酒新熟山中歸黃雞啄黍秋正肥呼童烹雞酌白酒兒女  
嬉笑牽人衣高歌取醉欲自慰起舞落日爭光輝游說萬乘  
苦不蚤著鞭跨馬涉遠道會稽愚婦輕買臣余亦辭家西入  
秦仰天大笑出門去我輩豈是蓬蒿人

單父東樓秋夜送族弟沈之秦

時凝弟  
在席

爾從咸陽來問我何勞苦沐猴而冠不足言身騎土牛滯東  
魯沈弟欲行凝弟畱孤飛一雁秦雲秋坐來黃葉落四五北  
斗已挂西城樓絲桐感人絃亦絕滿堂送君皆惜別卷簾見  
月清興來疑是山陰夜中雪明日斗酒別惆悵清路塵遙望  
長安日不見長安人長安宮闕九天上此地曾經爲近臣一  
朝復一朝髮白心不改屈原憔悴滯江潭亭伯流離放遼海



折翮翻飛隨轉蓬聞弦虛墜下霜空聖朝久棄青雲士他日誰憐張長公

宣州謝眺樓餞別校書叔雲

一作陪侍御叔華登樓歌

棄我去者昨日之日不可留亂我心者今日之日多煩憂長風萬里送秋雁對此可以酣高樓蓬萊文章建安骨中間小謝又清發俱懷逸興壯思飛欲上青天覽日月抽刀斷水水更流舉杯銷愁愁更愁人生在世不稱意明朝散髮弄扁舟

答王十二寒夜獨酌有懷

昨夜吳中雪子猷佳興發萬里浮雲卷碧山青天中道流孤月孤月滄浪河漢清北斗錯落長庚明懷余對酒夜霜白玉牀金井水崢嶸人生飄忽百年內且須酣暢萬古情君不能



狸膏金距學鬪雞坐令鼻息吹虹霓君不能學哥舒橫行青  
海夜帶刀西屠石堡取紫袍吟詩作賦北窗裏萬言不直一  
杯水世人聞此皆掉頭有如東風射馬耳魚目亦笑我請與  
明月同驂騑拳跼不能食蹇驢得志鳴春風折楊皇華合流  
俗晉君聽琴枉清角巴人誰肯和陽春楚地由來賤奇璞黃  
金散盡交不成白首爲儒身被輕一談一笑失顏色蒼蠅貝  
錦喧謗聲曾參豈是殺人者讒言三及慈母驚與君論心握  
君手榮辱於余亦何有孔聖猶聞傷鳳麟董龍更是何雞狗  
一生傲岸苦不諧恩疏媒勞志多乖嚴陵高揖漢天子何必  
長劒挂頤事玉階達亦不足貴窮亦不足悲韓信羞將絳灌  
比彌衡恥逐屠沽兒君不見李北海英風豪氣今何在君不



見裴尙書土墳三尺蒿棘居少年早欲五湖去見此彌將鐘鼎疏

寄遠

十一首

憶昨東園桃李紅碧枝與君此時初別離金瓶落井無消息  
令人行歎復坐思坐思行歎成楚越春風玉顏畏銷歇碧窗  
紛紛下落花青樓寂寂空明月兩不見但相思空畱錦字表  
心素至今緘愁不忍窺



讀雪山房唐詩卷九終



讀雪山房唐詩卷十 目錄一 詩廿二

七古目錄三

杜甫六十二首







讀雪山房唐詩卷十

七古三

元都壇歌寄元逸人

杜甫

故人昔隱東蒙峰已佩含景蒼精龍故人今居子午谷獨在  
陰崖結茅屋屋前太古元都壇青石漠漠常風寒子規夜啼  
山竹裂王母晝下雲旗翻知君此計成長往芝草琅玕日應  
長鐵鎖高垂不可攀致身福地何蕭爽

兵車行

車麟麟馬蕭蕭行人弓箭各在腰耶孃妻子走相送塵埃不  
見咸陽橋牽衣頓足闌道哭哭聲直上千雲霄道傍過者問  
行人行人但云點行頻或從十五北防河便至四十西營田



去時里正與裏頭歸來頭白還戍邊邊亭流血成海水武皇  
開邊意未已君不聞漢家山東二百州千村萬落生荆杞縱  
有健婦把鋤犁禾生隴畝無東西況復秦兵耐苦戰被驅不  
異犬與雞長者雖有問役夫敢申恨且如今年冬未休關西  
卒縣官急索租租稅從何出信知生男惡反是生女好生女  
猶得嫁比鄰生男埋沒隨百草君不見青海頭古來白骨無  
人收新鬼煩冤舊鬼哭天陰雨濕聲啾啾

高都護驄馬行

安西都護胡青驄聲價歛然來向東此馬臨陣久無敵與人  
一心成大功功成惠養隨所致飄飄遠自流沙至雄姿未受  
伏櫪恩猛氣猶思戰場利腕促蹄高如踣鐵交河幾蹴層冰



裂五花散作雲滿身萬里方看汗流血長安壯兒不敢騎走  
過掣電傾城知青絲絡頭爲君老何由卻出橫門道

天育驃騎歌

吾聞天子之馬走千里今之畫圖無乃是何意態雄且傑  
駿尾蕭梢朔風起毛爲綠縹兩耳黃眼有紫燄雙瞳方矯矯  
龍性合變化卓立天骨森開張伊昔太僕張景順監牧攻駒  
閱清峻遂令大奴守天育別養驥子憐神俊當時四十萬匹  
馬張公歎其材盡下故獨寫真傳世人見之座右久更新年  
多物化空形影嗚呼健步無由騁如今豈無騾褭與驊騮時  
無王良伯樂死卽休

秋雨歎

三首  
之一



雨中百草秋爛死，階下決明顏色鮮。  
著葉滿枝翠羽蓋，開花無數黃金錢。  
涼風蕭蕭吹汝急，恐汝後時難獨立。  
堂上書生空白頭，臨風三嗅馨香泣。

醉時歌

諸公衮衮登臺省，廣文先生官獨冷。  
甲第紛紛厭粱肉，廣文先生飯不足。  
先生有道出羲皇，先生有才過屈宋。  
德尊一代常軼軻，名垂萬古知何用。  
杜陵野客更嗤被褐短窄鬢如絲，  
日糴太倉五升米，時赴鄭老同襟期。  
得錢卽相覓沽酒，不復疑忘形到爾。  
汝痛飲真吾師，清夜沈沈動春酌。  
燈前細雨檐花落，但覺高歌有鬼神。  
焉知餓死填溝壑，相如逸才親滌器。  
子雲識字終投閣，先生早賦歸去來。  
石田茅屋荒蒼苔，儒



術於我何有哉孔邱盜跖俱塵埃不須聞此意慘愴生前相遇且銜杯

醉歌行

陸機二十作文賦汝更小年能綴文總角草書又神速世上兒子徒紛紛驕驕作駒已汗血驚鳥舉翮連青雲詞源倒流三峽水筆陣獨掃千人軍只今年纔十六七射策君門期第一舊穿楊葉真自知暫蹶霜蹄未爲失偶然擢秀非難取會是排風有毛質汝身已見唾成珠汝伯何由髮如漆春光淡沲秦東亭渚蒲牙白水荇青風吹客衣日杲杲樹攬離思花冥冥酒盡沙頭雙玉餅眾賓皆醉我獨醒乃知貧賤別更苦吞聲躑躅涕淚零



詩集卷一  
送孔巢父謝病歸遊江東兼呈李白

巢父掉頭不肯住東將入海隨煙霧詩卷長畱天地間釣竿  
欲拂珊瑚樹深山大澤龍蛇遠春寒野陰風景暮蓬萊織女  
回雲車指點虛無是征路自是君身有仙骨世人那得知其  
故惜君只欲苦死畱富貴何如草頭露蔡侯靜者意有餘清  
夜置酒臨前除罷琴惆悵月照席幾歲寄我空中書南尋禹  
穴見李白道甫問信今何如

飲中八仙歌

知章騎馬似乘船眼花落井水底眠汝陽三斗始朝天道逢  
麴車口流涎恨不移封向酒泉左相日興費萬錢飲如長鯨  
吸百川銜杯樂聖稱世賢宗之瀟灑美少年舉觴白眼望青



天皎如玉樹臨風前蘇晉長齋繡佛前醉中往往愛逃禪李  
白斗酒詩百篇長安市上酒家眠天子呼來不上船自稱臣  
是酒中仙張旭三杯草聖傳脫帽露頂王公前揮毫落紙如  
雲煙焦遂五斗方卓然高談雄辯驚四筵

曲江

三首  
之一

自斷此生休問天杜曲幸有桑麻田故將移住南山邊短衣  
匹馬隨李廣看射猛虎終殘年

麗人行

三月三日天氣新長安水邊多麗人態濃意遠淑且真肌理  
細膩骨肉勻繡羅衣裳照暮春蹙金孔雀銀麒麟頭上何所  
有翠微鬋葉垂鬢脣背後何所見珠壓腰極穩稱身就中雲



幕椒房親賜名大國號與秦紫駝之峰出翠釜水精之盤行  
素鱗犀箸厭飫久未下鑿刀縷切空紛綸黃門飛鞚不動塵  
御廚絡繹送八珍簫鼓哀吟感鬼神賓從雜遝實要津後來  
鞍馬何逡巡當軒下馬入錦茵楊花雪落覆白蘋青鳥飛去  
銜紅巾炙手可熱勢絕倫慎莫近前丞相嗔

### 樂遊園歌

樂遊古園萃森爽煙綿碧草萋萋長公子華筵勢最高秦川  
對酒平如掌長生木瓢示真率更調鞍馬狂歡賞青春波浪  
芙蓉園白日雷霆夾城仗閭闔晴開眖蕩蕩曲江翠幕排銀  
榜拂水低徊舞袖翻綠雲清切歌聲上卻憶年年人醉時只  
今未醉已先悲數莖白髮那拋得百罰深杯亦不辭聖朝亦



知賤士醜一物自荷皇天慈此身飲罷無歸處獨立蒼茫自  
詠詩

漢陂行

岑參兄弟皆好奇攜我遠來遊漢陂天地黢慘忽異色波濤  
萬頃堆琉璃琉璃汗漫泛舟入事殊興極憂思集鼉作鯨吞  
不復知惡風白浪何嗟及主人錦帆相爲開舟子喜甚無氛  
埃鳧鷖散亂權謳發絲管啁啾空翠來沈竿續蔓深莫測菱  
葉荷花靜如拭宛在中流渤澥清下歸無極終南黑半陂已  
南純浸山動影裏窕沖融間船舷暝憂雲際寺水面月出藍  
田關此時驪龍亦吐珠馮夷擊鼓羣龍趨湘妃漢女出歌舞  
金支翠旗光有無咫尺但愁雷雨至蒼茫不曉神靈意少壯



詩集卷一  
三  
幾時奈老何向來哀樂何其多

白絲行

繰絲須長不須白越羅蜀錦金粟尺象牀玉手亂殷紅萬草  
千花動凝碧已悲素質隨時染裂下鳴機色相射美人細意  
熨貼平裁縫滅盡鍼線迹春天衣著爲君舞蛺蝶飛來黃鸝  
語落絮游絲亦有情隨風照日宜輕舉香汗輕塵汚顏色開  
新合故置何許君不見才士汲引難恐懼棄捐忍羈旅

沙苑行

君不見左輔白沙如白水繚以周牆百餘里龍媒昔是渥洼  
生汗血今稱獻於此苑中駉牝三千匹豐草青青寒不死食  
字<sup>音</sup>之豪健西域無每歲攻駒冠邊鄙王有虎臣司苑門入門



天廐皆雲屯驕驕一骨獨當御春秋二時歸至尊至尊內外  
馬盈億伏櫪在垆空大存逸羣絕足信殊傑倜儻權奇難具  
論纍纍埽阜藏奔突往往坡陀縱超越角壯翻同麋鹿遊浮  
深簸蕩龜鼉窟泉出巨魚長比人丹砂作尾黃金鱗豈知異  
物同精氣雖未成龍亦有神

驄馬行

鄧公馬癖人共知初得花驄大苑種夙昔傳聞思一見牽來  
左右神皆竦雄姿逸態何嶢嶢顧影驕嘶自矜寵隅目青熒  
夾鏡懸肉駿礪礪連錢動朝來久試華軒下未覺千金滿高  
價赤汗微生白雪毛銀鞍卻覆香羅帕卿家舊賜公取之天  
廐真龍此其亞晝洗須騰涇渭深朝趨可刷幽并夜吾聞良



言  
驥老始成此馬數年人更驚豈有四蹄疾於鳥不與八駿俱  
先鳴時俗造次那得致雲霧晦冥方降精近聞下詔喧都邑  
肯使騏驎地上行

奉先劉少府新畫山水障歌

堂上不合生楓樹怪底江山起煙霧聞君掃卻赤縣圖乘興  
遣畫滄洲趣畫師亦無數好手不可遇對此融心神知君重  
毫素豈但祁岳與鄭虔筆迹遠過楊契丹得非懸圃裂無乃  
瀟湘翻悄然坐我天姥下耳邊已似聞清猿反思前夜風雨  
急乃是蒲城鬼神入元氣淋漓障猶濕真宰上訴天應泣野  
亭春還雜花遠漁翁暝蹋孤舟立滄浪水深青溟闊欹岸側  
島秋毫末不見湘妃鼓瑟時至今斑竹臨江活劉侯天機精



愛畫入骨髓自有兩兒郎揮灑亦莫比大兒聰明到能添老  
樹巔崖裏小兒心孔開貌得山僧及童子若耶溪雲門寺吾  
獨胡爲在泥滓青鞵布韞從此始

悲陳陶

孟冬十郡良家子血作陳陶澤中水野曠天清無戰聲四萬  
義軍同日死羣胡歸來血洗箭仍唱胡歌飲都市都人回面  
向北啼日夜更望官軍至

悲青阪

我軍青阪在東門天寒飲馬太白窟黃頭奚兒日向西數騎  
彎弓敢馳突山雪河冰野蕭颼青是峰煙白人骨焉得附書  
與我軍忍待明年莫倉卒



哀江頭

少陵野老吞聲哭春日潛行曲江曲江頭宮殿鎖千門細柳  
新蒲爲誰綠憶昔霓旌下南苑苑中萬物生顏色昭陽殿裏  
第一人同輦隨君侍君側輦前才人帶弓箭白馬嚼齧黃金  
勒翻身向天仰射雲一箭正墜雙飛翼明眸皓齒今何在血  
污游魂歸不得清渭東流劒閣深去住彼此無消息人生有  
情淚霑臆江水江花豈終極黃昏胡騎塵滿城欲往城南望  
城北

哀王孫

長安城頭頭白烏夜飛延秋門上呼又向人家啄大屋屋低  
達官走避胡金鞭斷折九馬死骨肉不待同馳驅腰下寶玦



青珊瑚可憐王孫泣路隅問之不肯道姓名但道困苦乞爲  
奴已經百日竄荆棘身上無有完肌膚高帝子孫盡隆準龍  
種自與常人殊豺狼在邑龍在野王孫善保千金軀不敢長  
語臨交衢且爲王孫立斯須昨夜東風吹血腥東來橐駝滿  
舊都朔方健兒好身手昔何勇銳今何愚竊聞天子已傳位  
聖德北服南單于花門虜面請雪恥慎勿出口他人狙哀哉  
王孫慎勿疏五陵佳氣無時無

蘇端薛復筵簡薛華醉歌

文章有神交有道端復得之名譽早愛客滿堂盡豪翰開筵  
上日思芳草安得健步移遠梅亂插繁花向晴昊千里猶殘  
舊冰雪百壺且試開懷抱垂老惡聞戰鼓悲急觴爲緩憂心



詩集卷一  
擣少年努力縱談笑看我形容已枯槁坐中薛華善醉歌歌

辭自作風格老近來海內爲長句汝與山東李白好何遜劉

孝約沈謝力未工才兼鮑昭愁絕倒諸生頗盡新知樂萬

事終傷不自保氣酣日落西風來願吹野水添金杯如澠之

酒常快意亦知窮愁安在哉忽憶雨時秋井塌古人白骨生

青苔如何不飲令心哀

偈仄

一作側

行贈畢曜

偈仄復偈仄我居巷南子巷北可恨鄰里間十日不一見顏  
色自從官馬送還官行路難行澀如棘我貧無乘非無足昔  
者相過今不得實不是愛微軀又非關足無力徒步翻愁官  
長怒此心炯炯君應識曉來急雨春風顛睡美不聞鐘鼓傳



東家蹇驢許借我泥滑不敢騎朝天已令請急會通籍男兒  
信命絕可憐焉能終日心拳拳憶君誦詩神凜然辛夷始花  
亦已落況我與子非壯年街頭酒價常苦貴方外酒徒稀醉  
眠速宜相就飲一斗恰有三百青銅錢

洗兵馬

中興諸將收山東捷書夜報清書同河廣傳聞一葦過胡危  
命在破竹中祇殘鄴城不日得獨任朔方無限功京師皆騎  
汗血馬回紇餵肉葡萄宮已喜皇威清海岱常思仙仗過崆  
峒三年笛裏關山月萬國兵前草木風成王功大心轉小郭  
相謀深古來少司徒清鑒懸明鏡尙書氣與秋天沓二三豪  
俊爲時出整頓乾坤濟時了東走無復憶鱸魚南飛覺有安



巢鳥青春復隨冠冕入紫禁正耐煙花繞鶴禁通霄鳳輦備  
雞鳴問寢龍樓曉攀龍附鳳勢莫當天  
下盡化爲侯王汝等  
豈知蒙帝力時來不得誇身強關中旣畱蕭丞相幕下復用  
張子房張公一生江海客身長九尺鬚眉蒼徵起適遇風雲  
會扶顛始知籌策良青袍白馬更何有後漢今周喜再昌寸  
地尺天皆入貢奇祥異端爭來送不知何國致白環復道諸  
山得銀甕隱士休歌紫芝曲詞人解撰河清頌田家望望惜  
雨乾布穀處處催春種淇上健兒歸莫嬾城南思婦愁多夢  
安得壯士挽天河淨洗甲兵長不用

李鄠縣丈人胡馬行

丈人駿馬名胡驪前年避胡過金牛回鞭卻走見天子朝飲



漢水暮靈州自矜胡驪奇絕代乘出千人萬人愛一聞說盡  
急難材轉益愁向駑駘輩頭上銳耳批秋竹腳下高蹄削寒  
玉始知神龍別有種不比俗馬空多肉洛陽大道時再清累  
日喜得俱東行鳳臆龍暑未易識側身注目長風生

瘦馬行

東郊瘦馬使我傷骨骼硤兀如堵牆絆之欲動轉欹側此豈  
有意仍騰驤細看六印帶官字眾道三軍遺路旁皮乾剝落  
雜泥滓毛暗蕭條連雪霜去歲奔波逐餘寇驂驪不慣不得  
將士卒多騎內廐馬惆悵恐是病乘黃當時厯塊誤一蹙委  
棄非汝能周防見人慘澹若哀訴失主錯莫無晶光天寒遠  
放雁爲伴日暮不收鳥啄瘡誰家且養願終惠更試明年春



言雪山房詩卷十  
十一  
草長

乾元中寓居同谷縣作歌七首

有客有客字子美白頭亂髮垂過耳歲拾橡栗隨狙公天寒  
日暮山谷裏中原無書歸不得手腳凍皴皮肉死嗚呼一歌  
兮歌已哀悲風爲我從天來

長鑱長鑱白木柄我生托子以爲命黃精無苗山雪盛短衣  
數挽不掩脛此時與子空歸來男呻女吟四壁靜嗚呼二歌  
兮歌始放鄰里爲我色惆悵

有弟有弟在遠方三人各瘦何人強生別展轉不相見胡塵  
暗天道路長東飛鴛鴦後鶯鶯安得送我置汝旁嗚呼三歌  
兮歌已發汝歸何處收兄骨



有妹有妹在鍾離良人早歿諸孤癡長淮浪高蛟龍怒十年  
不見來何時扁舟欲往箭滿眼杳杳南國多旌旗嗚呼四歌  
兮歌四奏林猿爲我啼清晝

四山多風溪水急寒雨颯颯枯樹濕黃蒿古城雲不開白狐  
跳梁黃狐立我生何爲在窮谷中夜起坐萬感集嗚呼五歌  
兮歌正長魂招不來歸故鄉

南有龍兮在山湫古木龍嵒枝相樛木葉黃落龍正蟄蝮蛇  
東來水上游我行怪此安敢出拔劍欲斬且復休嗚呼六歌  
兮歌思遲溪壑爲我回春姿

男兒生不成名身已老三年飢走荒山道長安卿相多少年  
富貴應須致身早山中儒生舊相識但話宿昔傷懷抱嗚呼



言室山房詩卷一  
七歌兮悄終曲仰視皇天白日速

題壁畫馬歌

畫  
韋偃

韋侯別我有所適知我憐君畫無敵  
戲拈秃筆掃驊驢歛見  
騏驎出東壁一匹嚙草一匹嘶  
坐看千里當霜蹄時危安得  
真致此與人同生亦同死

戲題畫山水圖歌

十日畫一水五日畫一石能事不受相促迫  
王宰始肯留真  
跡壯哉崑崙方壺圖挂君高堂之素壁  
巴陵洞庭日本東赤  
岸水與銀河通中有雲氣隨飛龍舟人漁子入浦溆  
山木盡  
亞洪濤風尤工遠勢古莫比咫尺應須論萬里  
焉得并州快  
剪刀剪取吳淞半江水



題李尊師松樹障子歌

老夫清晨梳白頭元都道士來相訪握髮呼兒延入戶手提  
新畫青松障障子松林靜杳冥憑軒忽若無丹青陰崖卻承  
霜雪幹偃蓋反走蚪龍形老夫平生好奇古對此興與精靈  
聚已知仙客意相親更覺良工心獨苦松下丈人巾履同偶  
坐似是商山翁悵望聊歌紫芝曲時危慘澹來悲風

戲爲雙松圖歌

韋偃畫

天下幾人畫古松畢宏已老韋偃少絕壁長風起纖末滿堂  
動色嗟神妙兩株慘裂苔蘚皮屈鐵交錯回高枝白摧朽骨  
龍虎死黑入太陰雷雨垂松根胡僧憩寂寞龐眉皓首無住  
著偏袒右肩露雙腳葉裏松子僧前落韋侯韋侯數相見我



詩集卷一  
三  
有一匹好東絹重之不減錦繡段已令拂拭光凌亂請公放  
筆爲直幹

百憂集行

憶年十五心尙孩健如黃犢走復來庭前八月梨棗熟一日  
上樹能千回卽今倏忽已五十坐臥只多少行立強將笑語  
供主人悲見生涯百憂集入門依舊四壁空老妻視我顏色  
同癡兒未知父子禮叫怒索飯啼門東

戲作花卿歌

成都猛將有花卿學語小兒知姓名用如快鶻風火生見賊  
唯多身始輕縣州副使著柘黃我卿掃除卽日平子章髑髏  
血模糊手提擲還崔大夫李侯重有此節度人道我卿絕世



無旣稱絕世無天子何不喚取守京都

枏樹爲風雨所拔歎

倚江枏樹草堂前故老相傳二百年  
誅茅卜居總爲此五月  
髣髴聞寒蟬東南飄風動地至江翻石走流雲氣幹排雷雨  
猶力爭根斷泉源豈天意滄波老樹性所愛浦上童童一青  
蓋野客頻畱懼雪霜行人不過聽竽簫虎倒龍顛委榛棘淚  
痕血點垂胸臆我有新詩何處吟草堂自此無顏色

茅屋爲秋風所破歌

八月秋高風怒號卷我屋上三重茅  
茅飛渡江灑江郊高者  
挂胃長林梢下者飄轉沈塘坳  
南邨羣童欺我老無力忍能  
對面爲盜賊公然抱茅入竹去  
唇焦口燥呼不得歸來倚杖



言雪山房集詩卷一  
三  
自歎息俄頃風定雲墨色秋天漠漠向昏黑布衾多年冷似  
鐵驕兒惡臥踣裏裂牀牀屋漏無乾處兩腳如麻未斷絕自  
經喪亂少睡眠長夜霑濕何由徹安得廣廈千萬間大庇天  
下寒士俱歡顏風雨不動安如山嗚呼何時眼前突兀見此  
屋吾廬獨破受凍死亦足

苦戰行

苦戰身死馬將軍白云伏波之子孫干戈未定失壯士使我  
歎恨傷精魂去年江南討狂賊臨江抱臂難再得別時孤雲  
今不飛時獨看雲淚橫臆

短歌行贈王郎司直

王郎酒酣拔劒斫地歌莫哀我能拔爾抑塞磊落之奇才豫



章翻風白日動鯨魚跋浪滄溟開且脫佩劍休裴回西得諸  
侯權錦水欲向何門跋珠履仲宣樓頭春色深青眼高歌望  
吾子眼中之人吾老矣

桃竹杖引贈章畱後

江心蟠石生桃竹蒼波噴浸尺度足斬根削皮如紫玉江妃  
水仙惜不得梓潼使君開一束滿堂賓客皆歎息憐我老病  
贈兩莖出入爪甲鏗有聲老夫復欲東南征乘濤鼓枻白帝  
城路幽必爲鬼神奪拔劍或與蛟龍爭重爲告曰杖兮杖兮  
爾之生也甚正直慎勿見水踴躍學變化爲龍使我不得爾  
之扶持滅跡於君山湖上之青峰噫風塵瀕洞兮豺虎齧人  
忽失雙杖兮吾將曷從



言言山房詩卷一  
四  
韋諷錄事宅曹將軍畫馬圖

國初已來畫鞍馬神妙獨數江都王將軍得名三十載人間  
又見真乘黃曾貌先帝照夜白龍池十日飛霹靂內府殷紅  
馬腦盃健仔傳詔才人索盃賜將軍拜舞歸輕紈細綺相追  
飛貴戚權門得筆跡始覺屏障生光輝昔日太宗拳毛騮近  
時郭家師子花今之新圖有二馬復令識者久歎嗟此皆騎  
戰一敵萬縞素漠漠開風沙其餘七匹亦殊絕迥若寒空動  
煙雪霜蹄蹴蹋長楸間馬官廐養森成列可憐九馬爭神駿  
顧視清高氣深穩借問苦心愛者誰後有韋諷前支遁憶昔  
巡幸新豐宮翠華拂天來向東騰驤磊落三萬匹皆與此圖  
筋骨同自從獻寶朝河宗無復射蛟江水中君不見金粟堆



前松柏裏龍媒去盡鳥呼風

丹青引贈曹將軍霸

將軍魏武之子孫於今爲庶爲清門英雄割劇雖已矣文彩  
風流猶尙存學書初學衛夫人但恨無過王右軍丹青不知  
老將至富貴於我如浮雲開元之中常引見承恩數上南薰  
殿凌煙功臣少顏色將軍下筆開生面良相頭上進賢冠猛  
將腰間大羽箭裒公鄂公毛髮動英姿颯爽來酣戰先帝天  
馬玉花驄畫工如山貌不同是日牽來赤墀下迥立閭闔生  
長風詔謂將軍拂絹素意匠慘澹經營中斯須九重眞龍出  
一洗萬古凡馬空玉花卻在御榻上榻上庭前屹相向至尊  
含笑催賜金圉人太僕皆惆悵弟子韓幹早入室亦能畫馬



窮殊相幹惟畫肉不畫骨忍使驂驪氣凋喪將軍善畫蓋有神偶逢佳士亦寫真卽今飄泊干戈際屢貌尋常行路人途窮反遭俗眼白世上未有如公貧但看古來盛名下終日坎壈纏其身

寄韓諫議

今我不樂思岳陽身欲奮飛病在牀美人娟娟隔秋水濯足洞庭望八荒鴻飛冥冥日月白青楓葉赤天雨霜玉京羣帝集北斗或騎麒麟翳鳳凰芙蓉旌旗煙霧落影動倒景搖瀟湘星宮之君醉瓊漿羽人稀少不在旁似聞昨者赤松子恐是漢代韓張良昔隨劉氏定長安帷幄未改神慘傷國家成敗吾豈敢色難腥腐餐風香周南畱滯古所惜南極老人應



壽昌美人胡爲隔秋水焉得置之貢玉堂

憶昔二首  
之一

憶昔開元全盛日小邑猶藏萬家室稻米流脂粟米白公私  
倉廩俱豐實九州道路無豺虎遠行不勞吉日出齊紈魯縞  
車班班男耕女桑不相失宮中聖人奏雲門天下朋友皆膠  
漆百餘年間未災變叔孫禮樂蕭何律豈聞一絹直萬錢有  
田種穀今流血洛陽宮殿燒焚盡宗廟新除狐兔穴傷心不  
忍問耆舊復恐初從亂離說小臣魯鈍無所能朝廷記識蒙  
祿秩周宣中興望我皇灑血江漢身衰疾

冬狩行

君不見東川節度兵馬雄校獵亦似觀成功夜發猛士三千



言雪山房詩卷一  
人清晨合圍步驟同禽獸已斃十七八殺聲落日回蒼穹幕  
前生致九青兕駝嵒崕垂元熊東西南北百里間髣髴蹴  
蹋寒山空有鳥名鸚鵡力不能高飛逐走蓬肉味不足登鼎  
俎何爲見羈虞羅中春蒐冬狩侯得同使君五馬一馬驄況  
今攝行大將權號令頗有前賢風飄然時危一老翁十年厭  
見旌旗紅喜君士卒甚整肅爲我回轡擒西戎草中狐兔盡  
何益天子不在咸陽宮朝廷雖無幽王禍得不哀痛塵再蒙  
嗚呼得不哀痛塵再蒙

閩山歌

閩州城東靈山白閩州城北玉臺碧松浮欲盡不盡雲江動  
將崩未崩石那知根無鬼神會已覺氣與嵩華敵中原格鬪



且未歸應結茅齋看青壁

折檻行

嗚呼房魏不復見秦王學士時難羨青衿胄子困泥塗白馬將軍若雷電千載少似朱雲人至今折檻空嶙峋婁公不語宋公語尙憶先皇容直臣

古柏行

孔明廟前有老柏柯如青銅根如石霜皮溜雨四十圍黛色參天二千尺君臣已與時際會樹木猶爲人愛惜雲來氣接巫峽長月出寒通雪山白憶昨路繞錦亭東先主武侯同閔宮崔嵬枝幹郊原古窈窕丹青戶牖空落落盤踞雖得地冥冥孤高多烈風扶持自是神明力正直原因造化功大厦如



言身月言卷一  
三  
傾要梁棟萬牛回首邱山重不露文章世已驚未辭翦伐誰  
能送苦心豈免容螻蟻香葉終經宿鸞鳳志士幽人莫怨嗟  
古來材大難爲用

縛雞行

小奴縛雞向市賣雞被縛急相喧爭家中厭雞食蟲蟻不知  
雞賣還遭烹蟲雞於人何厚薄吾叱奴人解其縛雞蟲得失  
無了時注目寒江倚山閣

觀公孫大娘弟子舞劒器行

并序

大厯二年十月十九日夔府別駕元持宅見臨穎李  
十二娘舞劒器壯其蔚跂問其所師曰余公孫大娘  
弟子也開元三載余尙童穉記於郾城觀公孫氏舞



劒器渾脫瀏漓頓挫獨出冠時自高頭宜春梨園二  
伎坊內人洎外供奉曉是舞者聖文神武皇帝初公  
孫一人而已玉貌錦衣況余白首今茲弟子亦匪盛  
顏旣辨其由來知波瀾莫二撫事慷慨聊爲劒器行  
往者吳人張旭善草書帖數常於鄴縣見公孫大娘  
舞西河劒器自此草書長進豪蕩感激卽公孫可知  
矣

昔有佳人公孫氏一舞劒氣動四方觀者如山色沮喪天地  
爲之久低昂燿如羿射九日落矯如羣帝驂龍翔來如雷霆  
收震怒罷如江海凝清光絳脣珠袖兩寂寞況有弟子傳芬  
芳臨穎美人在白帝妙舞此曲神揚揚與余問答旣有以感



詩集山房集卷一  
時撫事增惋傷先帝侍女八千人公孫劒器初第一五十年  
間似反掌風塵傾動昏王室梨園子弟散如煙女樂餘姿映  
寒日金粟堆南木已拱瞿唐石城草蕭瑟玳筵急管曲復終  
樂極哀來月東出老夫不知其所往足繭荒山轉愁疾

李潮八分小篆歌

蒼頡鳥跡旣茫昧字體變化如浮雲陳倉石鼓又已訛大小  
二篆生八分秦有李斯漢蔡邕中間作者寂不聞嶧山之碑  
野火焚棗木傳刻肥失真苦縣光和尙骨立書貴瘦硬方通  
神惜哉李蔡不復得吾甥李潮下筆親尙書韓擇木騎曹蔡  
有鄰開元已來數八分潮也奄有二子成三人況潮小篆逼  
秦相快劒長戟森相向八分一字直百金蛟龍盤拏肉屈強



吳郡張顛誇草書草書非古空雄壯豈如吾甥不流宕丞相  
中郎丈人行巴東逢李潮逾月求我歌我今衰老才力薄潮  
乎潮乎奈汝何

荆南兵馬使太常卿趙公大食刀歌

太常樓船聲激嘈問兵刮寇超下牢牧出令奔飛百艘猛蛟  
突獸紛騰逃白帝寒城駐錦袍元冬示我胡國刀壯士短衣  
頭虎毛憑軒拔鞘天爲高翻風轉日木怒號冰翼雪澹傷哀  
孫鐫錯碧嬰鷗鵠膏铍鏑已瑩虛秋濤鬼物微振辭坑壕蒼  
水使者捫赤條龍伯國人罷釣鰲芮公回首顏色勞分閭救  
世用賢豪趙公玉立高歌起攬環結佩相終始萬歲持之護  
天子得君亂絲與君理蜀江如線如鍼水荆岑彈丸心未已



賊臣惡子休干紀魑魅魍魎徒爲耳妖腰亂領敢欣喜用之  
不高亦不庠不似長劍須天倚吁嗟光祿英雄弭大食寶刀  
聊可比丹青宛轉麒麟裏光芒六合無泥滓

王兵馬使二角鷹

悲臺蕭颯石龍嵒哀壑杈枒浩呼洶中有萬里之長江迴風  
滔日孤光動角鷹翻倒壯士臂將軍玉帳軒翠氣二鷹猛腦  
徐侯毳目如愁胡視天地杉雞竹兔不自惜溪虎野羊俱辟  
易韝上鋒稜十二翻將軍勇銳與之敵將軍樹勳起安西崑  
崙虞泉入馬蹄白羽曾肉三狡獬敢決豈不與之齊荆南芮  
公得將軍亦如角鷹下翔雲惡鳥飛飛啄金屋安得爾輩開  
其羣驅出六合梟鸞分



秋風二首  
之一

秋風淅淅吹我衣東流之水西日微天清小城擣練急石古  
細路行人稀不知明月爲誰好早晚孤帆他夜歸會將白髮  
倚庭樹故園池臺今是非

魏將軍歌

將軍昔著從事衫鐵馬馳突重兩銜披堅執銳略西極崑崙  
月窟東嶄巖君門羽林萬猛士惡若哮虎子所監五年起家  
列霜戟一日過海收風帆平生流輩徒蠢蠢長安少年氣欲  
盡魏侯骨聳精爽緊華岳峰尖見秋隼星纏寶校金盤陀夜  
騎天駟超天河欖槍熒惑不敢動翠蕤雲旛相蕩摩吾爲子  
起歌都護酒闌插劒肝膽露鉤陳蒼蒼風元武萬歲千秋奉



明主臨江節士安足數

醉歌行贈公安顏少府請顧八題壁

神仙中人不見得顏氏之子才孤標天馬長鳴待駕馭秋鷹  
整翮當雲霄君不見東吳顧文學君不見西漢杜陵老詩家  
筆勢君不嫌詞翰升堂爲君掃是日霜風凍七澤烏蠻落照  
銜赤壁酒酣耳熱忘頭白感君意氣無所惜一爲歌行歌主  
客

暮秋枉裴道州手札率爾遣興寄近呈蘇渙侍御

久客多枉友朋書素書一月凡一束虛名但蒙寒溫問泛愛  
不救溝壑辱齒落未是無心人舌存恥作窮途哭道州手札  
適復至紙長要自三過讀盈把那須滄海珠入懷本倚崑山



玉撥棄潭州百斛酒蕪沒瀟岸千株菊使我晝立煩兒孫令  
我夜坐費燈燭憶子初尉永嘉去紅顏白面花映肉軍符侯  
印取豈遲紫燕驟耳行甚速聖朝尙飛戰鬪塵濟世宜引英  
俊人黎元愁痛會蘇息夷狄跋扈徒逡巡授鉞築壇聞意旨  
顏綱漏網期彌綸郭欽上書見大計劉毅答詔驚羣臣他日  
更僕語不淺明公論兵氣益振傾壺簫管黑白髮舞劒霜雪  
吹青春宴筵會語蘇季子後來傑出雲孫比茅齋定王城郭  
門藥物楚老漁商市市北肩輿每聯袂郭南抱甕亦隱几無  
數將軍西第成早作丞相東山起鳥雀若肥秋粟菽蛟龍欲  
蟄寒沙水天下鼓角何時休陣前部曲終日死附書與裴因  
示蘇此生已媿須人扶致君堯舜付公等早據要路思捐軀



言言集卷一  
追酬故高蜀州人日見寄

并序

開文書帙中檢所遺忘因得故高常侍適往居在成  
都時高任蜀州刺史人日相憶見寄詩淚灑行間讀  
終篇末自枉詩已十餘年莫記存歿又六七年矣老  
病懷舊生意可知今海內忘形故人獨漢中王瑀與  
昭州敬使君超先在愛而不見情見乎辭大厯五年  
正月二十一日卻追酬高公此作因寄王及敬弟  
自蒙蜀州人日作不意清詩久零落今晨散帙眼忽開迸淚  
幽吟事如昨嗚呼壯士多慷慨合沓高名動寥廓歎我悽悽  
求友篇感時鬱鬱匡君略錦里春光空爛熳瑤墀侍臣已冥  
莫瀟湘水國傍鼃鼃鄂杜秋天失鵬鶚東西南北更誰論白



首扁舟病獨存遙拱北辰纏寇盜欲傾東海洗乾坤邊塞西  
蕃最充斥衣冠南渡多崩奔鼓瑟至今悲帝子曳裾何處覓  
王門文章曹植波瀾闊服食劉安德業尊長笛誰能亂愁思  
昭州詞翰與招魂



讀書山房唐詩卷十終







